

## Yesu Kalisi-te banye nivasa lohvu Maak kaavu

*Jon sen nalipis hil-ato nêêl Anutu-te vakasin  
(Matai 3:1-12; Luk 3:1-9,15-17; Jon 1:19-28)*

<sup>1</sup> Anutu Noow Yesu Kalisi-te banye nivasa dangga nyendoos-anjo, <sup>2</sup> + o 1:2 Mal 3:1; Mat 11:10\*ond Anutu-te omaaho Yesaia kaavu munggin nambe,

“Anutu nêêl nambe, ‘Onggango le, sa navu aambiing sate omaaho ti na naamunggin vu hong in samu gate mop.’ <sup>3</sup> + o 1:3 Ais 40:3\*Omaaho ti nando taaku lumbalaambambe navu teey lava nambe, ‘Ham samu Omaaho Bop-ate mop, ham galo yite mop nanjip nivalok.’ ”

<sup>4</sup> + o 1:4 Sin 13:24; 19:4\*Tombe yik Jon sen nalipis hil-ato ond la nando taaku lumbalaambambe nanêêl tanasin nambe hil langgilin londpayo de lanjipis bel in nambe Anutu kawiiy silate nipaya na. <sup>5</sup> Tombe hil vu taaku Yudia pin osin hil Yelusalem pin lôôt lala vu Jon-ambe lanêêl silate va nipaya langaah, tonde lipis sil hôôk bel bop Yoladan.

<sup>6</sup> + o 1:6 2King 1:8; Mat 11:8\*Jon lop lolop sen hil davu samu lak bik kamel anivalus-ato de havêêh let bik naavi, tonde naya sapeek osin bayiiluk natu yite vanôôn, <sup>7</sup> + o 1:7 Sin 13:25\*de nanêêl tanasin nambe, “Omaaho ti navu taamuyin sa, ond yite niwêêk savok sa. Sak sa omaaho nipaya,

same sa ningg vasa in nambe sa kavaayin yite suul osin saambiing kul

vaalu naambe hil kul-aso dawiing vu silate yêêv e. <sup>8</sup> Sak saalipis ham lak bel amu, de yik le biing-ambe ham anim vasa jak Vavi Vaambuung-ate niwêêk.”

*Yesu lipis bel*

*(Matai 3:13-17; Luk 3:21-22)*

<sup>9</sup> Tonde sim Yesu vu bayêên Nasalet Galili be la vu Jon, tombe lipis yi hôôk bel Yoladan. <sup>10</sup> Yesu naahen nahôôk bel-ambe nalakala, tombe yi baandoni kahe, de Vavi Vaambuung hato nambe manak tumbaliiy-ambe lakando yi. <sup>11</sup> + o 1:11 Saam 2:7; Ais 42:1; Mat 12:18; Mak 9:7\*Tombe lava ti laam vu baandoni nambe, “Sa noongg hong. Sahengg having hong lôôt osin sahengg anivasa vu hong.”

*Saalang sahi Yesu*

*(Matai 4:1-11; Luk 4:1-13)*

<sup>12</sup> Tombe sim Vavi Vaambuung wiing-ambe la taaku lumbalaamb. <sup>13</sup> + o 1:13 Saam 91:11-13\*La taaku lumbalaamb sen bik bamaan-ate taaku-to ond la nando busin doo-yuuh-ambe Saalang sahi yi, de angela dahôôvu yi.

*Yesu hako kul ak vu Galili*

*(Matai 4:12-17; Luk 4:14-15)*

<sup>14</sup> + o 1:14 Mak 6:17\*Latung Jon hôôk kalaam-bus lung la, tonde Yesu la Galili be nêêl Anutu-te banye nivasa langaah nambe, <sup>15</sup> + o 1:15 Mat 3:2; Gal 4:4\*“Busin sen Anutu navu ganggin yite hil-ato laam ngaaho lak lung la, om ham anggilin

ham alompayo be ham ambiing gaving banye nivasa.”

*Yesu teey hil paahuung dangga-so yumbeyuuh  
(Matai 4:18-22; Luk 5:1-11)*

<sup>16</sup> Yesu monaloh betum Galili nanyendangga tombe sim yi omaaho paahuung dangga yuuh, Simon ayuuh hali Endru, ond yuuh mondaate govak lukala betum, <sup>17</sup> + o 1:17 Mat 13:47\*tombe Yesu nêel vu yuuh nambe, “Manaam taamuyin sa in saambiing-ambe muuh gako omaahonôôn naambe sen muuh nako paahuung-ato.” <sup>18</sup> Om yik pavis atombe yuuh lavuuh yuuhate govak-ande yuuh sapa yi be yaal lala. <sup>19</sup> Tonde sim la daka having atombe yi Sebedi noow ayuuh Jems ayuuh hali Jon, yuuh dando lak kaanu be yuuh mosamu yuuhate govak, <sup>20</sup> le pavis atombe teey yuuh lala vu yi. De yuuh lavuuh mangganaan Sebedi osin yite hil kul vaha dando lak kaanu, de yuuh taamuyin yi be lala.

*Yesu hatiyy mamu nipaya la in omaaho ti  
(Luk 4:31-37)*

<sup>21</sup> + o 1:21 Mat 4:13\*Latok lala bayêên Kape-naum le mem Yuda-te busin sawaasin, tombe Yesu lukala dumb alo be wiing tanasin vu hil. <sup>22</sup> + o 1:22 Mat 7:28-29\*Tombe sil lavindis lôôt in yite tanasin, in me-nawiing tanasin nambe tanasin dangga-so le, yoo nawiing tanasin lohvu yêêv bop ti. <sup>23</sup> De omaaho ti nando hôôk dumb alo ond mamu nipaya hôôvu yi, tombe teey nambe, <sup>24</sup> + o 1:24 Mak 5:7\*“Yesu Nasalet, gayêêvu hey in? Galaam

in nambe kawiiy hey na? Sa lak ganim nambe Anutu-te omaaho vaambuung hong.” <sup>25</sup> Le Yesu nêel mamuu-ju nambe, “Olavam nama, ong-gavuuh omaahonôn-anja de gana.” <sup>26</sup> + o 1:26 Mak 9:26\*Tombe mamu hangeeyak bopaata be handu omaahonôn-ande hato be la. <sup>27</sup> Tombe hil pin lavindis lôôt-ambe lanêel vu sil nambe, “Vaatii-ju? Tanasin moos tii-ju mava? Nanêel va osin niwêek om mamu nipaya nanyend vuun in lava.” <sup>28</sup> + o 1:28 Mat 4:24\*Tombe Yesu banye la lohvu taaku Galili pin.

*Yesu wiing Pita yenaavêeh having hil ngeeyaata nind vasa lak*

*(Matai 8:14-17; Luk 4:38-41)*

<sup>29</sup> Sil vu dumb alo be lala voon, tombe Yesu having Jems ayuuh Jon-ambe yaal lalukala Simon ayuuh Endru-te bayêen alo. <sup>30</sup> Tombe Simon yenaavêeh anivaane be neep, tombe lanêel vu Yesu pavis, <sup>31</sup> om la laandiiy hôok nama be kandi lak, tombe nivaanêe-to lung la de kandi be la hayêeh vanôn-ambe vu vu sil.

<sup>32</sup> + o 1:32 Mat 4:24\*Tonde soosin hôok-ambe taaku me lukala, tombe lako hil anind lakin osin hil sen mamu nipaya dahôvu sil-ato pin lala vu yi. <sup>33</sup> Hil vu bayêen-anju pin lala lapup hôok vinavi, <sup>34</sup> + o 1:34 Mak 3:11-12\*tombe wiing hil anind lakin vaha vaha ngeeyaata nind vasa nalak laah, tonde hatiiy mamu ngeeyaata be lato dala in omaahonôn, de hilin mamu pin lavand jeen in nambe lalak ni nambe Anutu Noow yi om me-daanêel yi langaah e.

*Yesu nawiing tanasin vu Galili  
(Luk 4:42-44)*

<sup>35</sup> + o 1:35 Mat 14:23; Mak 6:46\*Yesu kandi hôôk heendiisin-ambe la taaku lu malis ti tombe lohak. <sup>36</sup> Tonde Simon-aso hil sen dando having yii-to lala davu salo yi, <sup>37</sup> tombe latovu be lanêêl vu yi nambe, “Hil pin davu salo hong.” <sup>38</sup> Tombe Yesu nêêl vu sil nambe, “Yana bayêên bu ti ti sen nando ngaahôô-to in saambiing tanasin vu sil gaving. Kul-anjo sen soo alaam in-ato.” <sup>39</sup> + o 1:39 Mat 4:23; 9:35\*Om yik la hatup hôôk taaku Galili pin, be nawiing tanasin hôôk silate dumb alo ti ti, de natiy mamu dala in omaahonôôn.

*Yesu wiing omaaho ti nipayêês anipayaya lôôt-ato  
nivasa lak  
(Matai 8:1-4; Luk 5:12-16)*

<sup>40</sup> Omaaho ti nipayêês anipayaya lôôt-ato la vu Yesu be hatung kaatu vu de kataangg nambe, “Lohvu gandôôvu sa be sa ningg naavi nivasa jak?” <sup>41</sup> Tombe Yesu ka pasiv in yi om hambe nama lak-ande nêêl vu nambe, “Êê-e, lohvu saandôôvu hong, om ganim naavi nivasa jak.” <sup>42</sup> Tombe yik payêês lung la pavis-ande ninaavi nivasa lak. <sup>43</sup> Lung atonde Yesu wiing-ambe la, de vu kôôvu yi nambe, <sup>44</sup> + o 1:44 Mak 3:12; 7:36; Lev 14:1-32\*“Ongganggin hong, game naanêêl vaa-jo vu omaaho ti le, nganjo gana taato ganim naavi vu kul vaha sen datung salivangin-ato ti de onggatung salivangin nohvu Mose-te tanasin nêêl-ato in nambe mem hil lanjok ni naambe ganim naavi nivasa lak lung la.” <sup>45</sup> Le ma de la

monanêêl vaa-jo banye hatup hôôk, om Yesu melohvu nambe dukana taaku ti be taato yi langaah e, om la nando taaku lu malis ti tombe hil vu taaku pin lala vu yi.

## 2

*Yesu wiing omaaho sen nama yuuh vaha nipayaa-to nivasa lak*  
(Matai 9:1-8; Luk 5:17-26)

<sup>1</sup> Busin heey lung la le mem Yesu laah Kape-naum yesin, tombe hil langoyin nambe nando baan. <sup>2</sup> Om hil ngeeyaata lasupin lala vu be lapup lôôt, be lahilin vinavi having, de taaku vuuti me-need e, tonde monanêêl Anutu-te banye nivasa vu sil. <sup>3</sup> Tombe hil lalaam-ambe omaaho yumbeyuuh laaku omaaho nipaling ti vaha yuuh nama nipayaa-to be lala in lana vu Yesu. <sup>4</sup> Le ma de hil ngeeyaata lahilin taaku de me-lukalaah nambe lana vu Yesu le, om sil kawiiy bayêên vuuti neep baandoni nivalok vu sen Yesu naalêêto, tonde mem taaluhin nilakin tii-jôôto osin kaanye lukala. <sup>5</sup> + o 2:5 Luk 7:48\*Yesu lak ni nambe sil alondpayo la timu vu yi om nêêl vu omaaho nipaling-anjo nambe, “Noongg-e, gate nipaya ond sa kawiiy la.” <sup>6</sup> Tombe hil tanasin dangga heey dandôô-ju kand vu nambe, <sup>7</sup> + o 2:7 Ais 43:25; 1Jon 1:9\*“Nêêl vaati nambêênju? Wiingin nambe savok Anutu. Lati lohvu nambe kawiiy nipaya na? Anutu timu yoo lohvu.” <sup>8</sup> Yesu yoo lak ni nambe sil oo kand vu nambêênju, om nêêl laah vu sil nambe, “Nambe vaati sen ham akam navu nambêênja hôôk ham alompayo? <sup>9</sup> De

sa naanêêl vakasin ango tana in ham angge be ham anjak ni naambe nôôn keen? Sa naanêêl vu omaaho nipalinganjo naambe, ‘Gate nipaya ond sa kawiiy la,’ ond ham-ame le anjak ni le. Nganjo sa naanêêl naambe, ‘Okandi baale be ombaahinin gate kaanye de gana,’ ond mem ham e anjak ni naambe nôôn keen. <sup>10</sup> Om peey-anjo ham anjak ni naambe Omaahonôôn Noow laam vu baandoni ond yoo tu danggakook vu voon in nambe kawiiy hil-ate va nipaya na.” Tonde nêêl vu omaaho nipaling-anjôôto nambe, <sup>11</sup> “Sa naanêêl vu hong naambe okandi gako gate kaanye jak-ambe ganaah gambaam.” <sup>12</sup> + o 2:12 Mat 9:33\*Tombe yik kandi pavis-ambe hako yite kaanye hôôk sil amend-ambe la. Tombe lavindis lôôt be mem lako Anutu haale lak-ambe lanêêl nambe, “Yame aahe vati nambêênjo bôôy e.”

### *Yesu teey Liwi*

*(Matai 9:9-13; Luk 5:27-32)*

<sup>13</sup> Yesu laah betum nanyendangga yesin, tombe hil pin lasupin lala vu yi be nawiing tanasin vu sil. <sup>14</sup> + o 2:14 Jon 1:43\*Lung la de monala tombe yi Alpias noow Liwi nando hôôk bayêên sen dako taakis hôôk-ato, tombe nêêl vu nambe, “Ganaam taamuyin sa.” Om kandi be la taamuyin yi.

<sup>15</sup> Tombe Yesu having yite maanggêêm-aso be lala dando be mondaya vanôôn vu Liwi baan, de hil sen dako taakis osin hil sen davu kalêêh tanasin-ato ngeeyaata lalaam-ambe dando daya vanôôn having sil. Yik hil ngeeyaata nambêênju yoo davu taamuyin yi. <sup>16</sup> + o 2:16 Mat 11:19; Luk 15:1-2\*Tonde yêêv Yuda heey yoo davu sapa

silate gambum ond danêêl sil nambe Palisai, ond silate tanasin dangga-so vaalu layi de Yesu naya vanôôn having hil anipaya osin hil sen dako taakis-ato, tombe lanêêl vu yite maanggêêm-aso nambe, “Nambe vaati sen naya vanôôn having hil sen dako taakis osin hil anipaya vaaluu-ju?”<sup>17</sup> Le Yesu hangoyin atombe nêêl vu sil nambe, “Hil anind vasa ond me-dala vu dokta le, nganjo hil sen nind lakin-ato ond mem dala vu. De sak same alaam in nambe naateey hil sen datee sil ak nambe sil anivasaa-to le, ma, nganjo sa laam in naateey hil anipaya.”

*Lalingin Yesu in hil dalakin sil in vanôôn  
(Matai 9:14-17; Luk 5:33-39)*

<sup>18</sup> Busin ti Jon-ate maanggêêm sen davu sapa yii-to osin hil Palisai dalakin sil in vanôôn-ande dando meep in nambe mondanohak na vu Anutu. Tonde omaaheey lalaam-ambe lalingin Yesu nambe, “Jon-ate maanggêêm-aso osin Palisai-te hil dalakin sil in vanôôn-ande dando meep, de nambe vaati sen gate maanggêêm-aso me-dalakin sil in vanôôn e?”<sup>19</sup> Tombe Yesu nêêl vakasin pakwesin-anjo vu sil nambe, “Hil lasupin lala in daapêêlis gaving omaaho ti in hako vêêh moos ond sil-ame lalohvu nambe lanjakin sil in vanôôn-ande sil mando meep e, le nama. In silate omaahô-ju naahen nando having sil, om sil-ame lalohvu nambe me-lanjakin sil in vanôôn-ande mando meep e.<sup>20</sup> Nganjo busin ti le naatok naam atombe hil e lanôôh omaahô-juuto na vêêl in yite hil, ond mem le lanjakin sil in vanôôn.

<sup>21</sup> “De tôômb ti nimbôôy-ambe ahembalap ak tombe kweek ond omaaho ti me-naanduuh moos



kamu ti jakanaah e. Le naambe naanduuh moos kamu ti jakanaah ond le naakweek nimbôôy-ato be naatu bopaata jak. <sup>22</sup> Omaaho ti me-le naatooy wain moos dukana bik naavi nimbôôy e. Naambe kaasêêh dukana ond wain e buuk-ambe bapuuuh bik naavi biliyak-ande kaasêêh na. Wain moos ond kaasêêh dukana bik naavi moos ond mem.”

*Vakasin lak busin sawaasin*  
(*Matai 12:1-8; Luk 6:1-5*)

<sup>23</sup> + o 2:23 Diu 23:25\*Busin sawaasin ti tombe Yesu having yite maanggêem-aso be laloh mop ti sen neep hôok kul lavuun-ato be lala, tombe yite maanggêem-aso kalêêh wit nôôn-ambe, landaah\*. <sup>24</sup> Tombe Palisai lanêêl vu yi nambe, “Gangge, nambe vaati sen davu kalêêh wit nôôn? In me-lohvu nambe yaambiing kul hôok busin sawaasin e.” <sup>25</sup> + o 2:25 1Sml 21:1-6\*Tombe nêêl vu sil nambe, “Vu hôôy sen vanôôn ma in Devit having yite hil sen laving yii-to, ond layimb ahend tombe wiing vaati? Mak ham-ame asevin mava? <sup>26</sup> + o 2:26 Lev 24:5-9\*Nambe hôôy sen Abaiata tu yêêv bop vu kul vaha sen datung salivangin-ato, ond Devit lukala Anutu-te dumb alo tombe

---

\* **2:23:** Yuda-te tanasin ti neep hôok Diuteronomi 23:25 nambe omaaho ti-te kul neep vu mop nanyendangga, tombe hil daloh mop-ambe dayimb ahend, ond sil kalêêh omaahôô-ju yite wit nôôn daka nanjip mop nanyendangga be sil gandaah-ande vakasin ma. Nganjo yêêv-aso danêêl nambe dôok busin sawaasin ond hil-ame kalêêh wit nôôn daka be gandaah e, in danêêlin va pin nambe hil-ame lambiing kul pasivdaka dôok busin sawaasin e, malis lôôt. Le Yesu nêêl Devit-ate vakasin laah vu Palisai-so in nambe bêêl sil alund jak, in sil sahi nambe Devit yimb ahe be ya vanôôn om lung, tonde Yesu-te maanggêem-aso ond me-kand pasiv in sil e.

ya vanôôn sen hil latung vu Anutuu-to. Vanôôn-anju ond tanasin neep nambe omaahonôôn-ame lanja le, yik kul vaha salivangin-ate yoo lanja, le ma de Devit ya de vu vu yite hil having.”

<sup>27</sup> + o 2:27 Diu 5:14\* Tonde Yesu nêêl vu sil nambe, “Anutu wiing busin sawaasin lundoos in dôôvu omaahonôôn, de me-hatung omaahonôôn in nambe kand bu busin sawaasin naatu bopaata lôôt savok sil e. <sup>28</sup> Om yik Omaahonôôn Noow tu busin sawaasin-ate danggakook having.”

### 3

*Yesu wiing omaaho ti nama nipaya nivasa lak  
(Matai 12:9-14; Luk 6:6-11)*

<sup>1</sup> Yesu lukala dumb alo yesin laah, tombe omaaho ti nama vaalu nipaya nandôô-ju. <sup>2</sup> + o 3:2 Luk 13:14\* Tombe hil-anju langget Yesu lôôt in nambe lanji naambe biing omaahôô-ju nama nivasa jak dôôk busin sawaasin, ond daanêêl vakasin ti jak yi. <sup>3</sup> Tombe nêêl vu omaaho ti sen nama nipayaa-to nambe, “Okandi be ganaam nganjo.” <sup>4</sup> + o 3:4 Luk 14:3\* Tonde lingin sil nambe, “Va ango tana lohvu tanasin nêêl, nambe yaambiing va nivasa dôôk busin sawaasin, me yaambiing va nipaya? Nambe yaandôôvu omaahonôôn-ambe mando nivasa me yaanyiis-ambe jimb?” Lemu sil oo dando lavand masin, <sup>5</sup> + o 3:5 Jon 11:33; 12:40\* tombe me hako hôôk sil-ande ahekalin-ambe lopayo nimeen in sil alondpayo niwêêk ak, tonde mem nêêl vu omaahôô-juuto nambe, “Otalo namam.” Om talo nama tombe nivasa lak. <sup>6</sup> + o 3:6 Mat 22:15-16\* Om pavis atombe

Palisai-so laluuus-ambe lala lasupin having Helot-ate hil be mem sil davu salo mopaatôôv in nambe lanyiis Yesu be jimb.

*Hil ngeeyaata lasupin dando betum Galili nanyendangga*

<sup>7</sup> Yesu having yite maanggêêm-aso be lala betum, tombe hil Galili ngeeyaata lôôt davu taamuyin sil, de hil vu taaku Yudia, <sup>8</sup> + o 3:8 Mat 4:25\*de vu Yelusalem osin taaku Idumia,

de vu bel Yoladan vaalu alo, de vu Taia yuuh Saidon. Hil ngeeyaata lôôt langoyin va pin sen nawiing-ato tombe lala vu yi, <sup>9</sup> + o 3:9 Mak 4:1; Luk 5:1-3\*om nêêl vu yite maanggêêm-aso nambe sil gako kaanu ti naam ganggin yi in nambe hil ngeeyaata om le langgilin yi. <sup>10</sup> + o 3:10 Mat 14:36\*In Yesu wiing hil ngeeyaata nind vasa lak lung la, ondeey hil anilakin pin dandu sil in nambe namand na palaah yi de nind vasa jak. <sup>11</sup> + o 3:11 Luk 4:41\*Tonde mamu nipaya sen lalukando omaahonôôn-ato layi Yesu tombe lala lato pataav baambund neep voon hôôk vaha, de langeeyak-ambe lateey nambe, “Anutu Noow hong.” <sup>12</sup> + o 3:12 Mak 1:34\*Tombe vu kôôvu sil niwêêk nambe sil-ame daanêêl yi langaah e.

*Yesu holin yite sinaale nomaayuuu-ambe laam yuuh*

*(Matai 10:1-4; Luk 6:12-16)*

<sup>13</sup> Yesu lakala taaku lu kandu ti be teey hil sen wiingin sil-ato be lala vu yi. <sup>14</sup> Tombe holin sil nomaayuuu-ambe laam yuuh in nambe sil mando gaving yi, de le biing sil lana daanêêl

tanasin gaving, <sup>15</sup> tonde bu niwêêk vu sil in nambe sil gatiy mamu gato na in omaahonôôn.

<sup>16</sup> + o 3:16 Jon 1:42\*Holin sil nomaayuuh-ambe laam yuuh-ato, de nêêl Simon haale ngo nambe Pita. <sup>17</sup> + o 3:17 Luk 9:54\*Tonde Sebedi noow ayuuh, Jems ayuuh Jon ond nêêl yuuh haalend ango nambe Boanesis, dangga nambe yuuh lalohvu kalang natuuh. <sup>18</sup> Tonde Endru, Pilip, Batolomai, Matai, Tomas, Alpias noow Jems, Tadias, Simon ango sen naanjiihin hil Yuda in nambe gatiy hil Lom lanaa-to, <sup>19</sup> de Yudas Iskaliot sen taato Yesu langaah-ambe hil lalôôh-ato.

### *Yesu yuuh Belsebul*

*(Matai 12:24-32; Luk 11:14-23; 12:10)*

<sup>20</sup> + o 3:20 Mak 6:31\*Yesu laah baan lemu hil ngeeyaata lasupin sil laah-ambe dando, tombe lahilin Yesu having yite maanggêêm-aso, de melalohvu nambe lanja vanôôn e. <sup>21</sup> + o 3:21 Jon 10:20\*Tombe Yesu-te hil lango be lala in nambe gako yi be lanaah, in lanêêl nambe, “Lukook wiing paya.” <sup>22</sup> + o 3:22 Mat 9:34; 10:25\*De tanasin dangga-so sen lalaam vu Yelusalem-ato lanêêl nambe, “Belsebul nando having yi.” De vaalu lanêêl nambe, “Mamu-te yêêv bop Belsebul hôôvu yi ondeey natiy mamu la in omaahonôôn.”

<sup>23</sup> Tombe Yesu teey-ambe hil lala vu yi, be nêêl vakasin pakwesin ti vu sil nambe, “Saalang e gatiy Saalang na naambe tana? <sup>24</sup> Naambe hil taaku bop ti yoo lanyis sil-ambe baasuh sil na lu yuuh, ond sil-ame lalohvu nambe mando nivasa le. <sup>25</sup> De naambe hil dangga ti sen dando hôôk bayêên timuu-to yoo lanyis sil-ambe baasuh sil

na lu yuuh, ond sil-ame le mando javuh ti le.  
<sup>26</sup> De naambe Saalang gatiiy yite kul vaha mamu nipaya-so ond

sil o Saalang-aso yoo laasuh sil la lu yuuh, ond sil-ame le mando javuh ti le, le nama. <sup>27</sup> Omaaho ti me-lohvu nambe jakana omaaho nipaya ni-wêêk ambaan-ambe bu vêêl yite va le. Biing naambêênjo ond naanduuh yi tatin, le mem gako yinêên va pin sen lukando bayêên alôô-to be na.

<sup>28</sup> “Sa naanêêl keen vu ham naambe va nipaya osin vakasin palesin pin sen omaahonôn danêêl-ato, ond Anutu lohvu nambe kawiiy na pin, <sup>29</sup> nganjo omaaho ti naanêêl Vavi Vaambuung pale, ond Anutu me-le kawiiy na le, yoo le nanjip danggata osin danggata.” <sup>30</sup> + o 3:30 Jon 10:20\*Yesu nêêl vakasin nambêênjo in danêêl nambe mamu nipaya ti nando having yi deey.

*Yesu tangganaan osin halindin*  
*(Matai 12:46-50; Luk 8:19-21)*

<sup>31</sup> + o 3:31 Mak 6:3; Jon 2:12; Sin 1:14\*Yesu tangganaan osin halindin lato daale voon-ambe lanêêl vakasin la vu yi. <sup>32</sup> Tonde hil ngeeyaata dando be lambuuh yi tatup tombe lanêêl vu nambe, “Ohangoyin a? Tam having halim-aso lato daale voon-ambe dalingin hong.” <sup>33</sup> Le nêêl laah vu sil nambe, “Ataak having halingg-aso laheey?” <sup>34</sup> Tonde me hako hôôk-ambe yi hil sen lambuuh yi tatup-ato be nêêl vu sil nambe, “Ham angge, ataak-aso halingg-aso sen manyinjo, <sup>35</sup> in hil sen dawiiing va lohvu Anutu ka ond mem sa halingg osin sa vangaangg-ambe sa ataak-aso sil.”

## 4

*Vakasin pakwesin lak omaaho ti vaalôôh vave  
(Matai 13:1-9; Luk 8:4-8)*

<sup>1</sup> + o 4:1 Mak 3:7-9; Luk 5:1-3\*Yesu laah betum nanyendanga be wiing tanasin yesin. Tombe hil ngeeyaata lasupin lala vu yi om lakala nando kaanu ti, de hil pin dando betum nanyendanga. <sup>2</sup> + o 4:2 Mat 13:34; Mak 4:33-34\*Tombe wiing tanasin lak vakasin pakwesin ngeeyaata ond nêêl ti vu sil nambe, <sup>3</sup> “Ham gango le. Omaaho ti la in nambe baalil vave dukana kul moos. <sup>4</sup> Monaalil atombe vaalu tok nando mop, tombe manak lalaam-ambe laya lôôt. <sup>5</sup> De vaalu tok lakando ngaanggis pasivdaka sen lakando tatuuh baandonii-to, tombe mem me valup pavis, <sup>6</sup> le ma de taaku vavak ak-ambe malan pavis, tombe bambôôv valok-ate in kangga me-lukala le. <sup>7</sup> De vaalu lukala ganggwak dangga, tombe ganggwak valup having-ambe yêês, om me-yiis nôôn e. <sup>8</sup> Tonde vaalu lukala ngaanggis anivasa ond valup-ambe yiis nôôn. Heey yiis nôôn doo-ti be nomaayuuh, de

heey yiis nôôn doo-yaal, de heey yiis nôôn doo-namaavaalu.” <sup>9</sup> Lung atonde nêêl nambe, “Omaaho ti nambe nanye neep ond gangoyin.”

*Yesu-te vakasin pakwesin-anju dangga nambe vaati?*

*(Matai 13:10-17; Luk 8:9-10)*

<sup>10</sup> Yesu nando lundoos e mem yite maanggêêm nomaayuuh-ambe laam yuuh-ato be hil vaalu lala dando having in gango vakasin, ond lalingin vakasin pakwesin dangga vu yi. <sup>11</sup> Tombe nêêl

vu sil nambe, “Ham ond mem Anutu nanêêl vakasin sen vun yii-to langaah vu ham lak sen Anutu nanggin yiyi-ato, lemu hil vaalu sen dando nanyendangaa-to ond dango vakasin pakwesin amu, <sup>12</sup> + o 4:12 Ais 6:9-10; Jon 12:40; Sin 28:26-27\*in nambe

‘Lanji lôôt lemu me-lanjak ni le, de gangoyin lôôt lemu me-daatokak dangga le. Nambêênja sil-ame langgilin sil alondpayo naah vu Anutu, de Anutu me-kawiiy silate nipaya na le.’ ”

*Yesu tatekin vakasin pakwesin lak vavêê-to  
(Matai 13:18-23; Luk 8:11-15)*

<sup>13</sup> Tombe Yesu nêêl vu sil nambe, “Ham-ame alak vakasin pakwesin tii-ju ni le, om ham e anjak vakasin pakwesin pin ani naambe tana?

<sup>14</sup> “Omaaho sen naalil vavêê-to ond lohvu omaaho nanêêl Anutu-te tanasin. <sup>15</sup> Vave vaalu tok nando mop ond lohvu hil vaalu dango vakasin, le ma de Saalang navu sapos vakasin sen dangôô-to nala pavis. <sup>16</sup> Tonde vave vaalu tok lakando ngaanggis pasivdaka sen lakando tatuuh baandonii-to, ond lohvu hil vaalu sen dango vakasin-ambe dako lak pavis-ambe dapêêlis, <sup>17</sup> + o 4:17 Mat 26:31\*lemu lalohvu va sen kangga me-lukala le, om dando daka vêêl e mem va nimeen natokak sil, me hil danêêl sil in davu sapa Anutu-te vakasin, tombe sim nind baya be davuuh Anutu la pavis. <sup>18</sup> Tonde vave vaalu sen tok lukala ganggwak danggaa-to, ond lohvu hil vaalu sen dango Anutu-te vakasin, <sup>19</sup> + o 4:19 Mat 19:23-24\*lemu sil alondpayo nimeen in kand navu va voon-ate osin menôôn in kupak ayuuh

mone bop, de sil oo dawiiingin va vaha vaha pin, tombe sil akand oo navu va nambêênjo natu bopaata nahilin Anutu-te vakasin, om me-le nôôn jak vu sil e. <sup>20</sup> De vave vaalu tok lukala ngaang-gis anivasaa-to, ond lohvu hil vaalu sen dango vakasin-ambe daasu lukala londpayo be dawii-having, ond sil dayiis nôôn lohvu vave yiis nôôn anivasaa-to, ond vaalu dayiis nôôn pasivdaka lohvu vave vaalu yiis nôôn 30, de vaalu dayiis nôôn ngeey daka lohvu vave vaalu yiis nôôn 60, de vaalu dayiis ngeeyaata lôôt lohvu vave vaalu yiis nôôn 100.”

*Vakasin pakwesin lak lam*  
(Luk 8:16-18)

<sup>21</sup> + o 4:21 Mat 5:15\*Yesu nêêl vu sil nambe, “Omaaho ti taalungg hôôk lam in nambe gatung dukana dêêngg alo me gatung dukana pêêt kambini mava? Malis, taalungg hôôk in nambe gatung jamando pêêt baandoni. <sup>22</sup> + o 4:22 Mat 10:26; Luk 12:2\*De vakasin pin sen neep vunin-ato ond le nanjip langaah, de vakasin sen vayum yii-to, ond le kavaayin naam langaah pin. <sup>23</sup> Omaaho ti nanye neep ond gangoyin.”

<sup>24</sup> + o 4:24 Mat 7:2\*Tombe nêêl vu sil nambe, “Va sen ham nango ond ham akam bu nivasa mem ham e naatokak vakasin dangga, de Anutu le biing-ambe ham anjak ni lôôt. <sup>25</sup> + o 4:25 Mat 13:12\*Omaaho ti ka navu vakasin nivasa ond Anutu le bu ka vaalu gaving-ambe jak ni lôôt. Le naambe omaaho ti doosin vakasin, de me-ka navu vakasin ti le, ond kakook daka sen neep vu yii-to ond Anutu le nôôh vêêl.”



*Vakasin pakwesin lak vave*

<sup>26</sup> Yesu nêêl nambe, “Anutu nanggin yite hil lohvu omaaho ti naalôôh vave hôôk kul moos, <sup>27</sup> + o 4:27 Jem 5:7\*tombe omaahôô-ju neep busin-ande kandi lak hôôk samiinaanôôn lohvu busin pin, tonde vave valup lemu doosin nambe vave valup-ambe bop ak nambe tana. <sup>28</sup> Ngaanggis yoo wiing-ambe vanôôn amekaalus valup-ambe lis ak, tombe nalu vuuk, tonde mem yiis nôôn anivasa. <sup>29</sup> + o 4:29 Joel 3:13; Taato 14:15\*Vanôôn nôôn ak lung la, le mem lasap ak yipak in vanôôn-ate busin lung la.”

*Vakasin pakwesin lak môônd nôôvoow  
(Matai 13:31-32; Luk 13:18-19)*

<sup>30</sup> Yesu nêêl nambe, “Yiyy taahu sen Anutu nanggin yite hil-ato jak vaati? Yiyy naanêêl vakasin pakwesin jak vaati? <sup>31</sup> Yik lohvu môônd nôôvoow, in môônd nôôvoow-anju ni-pasiv lôôt, de me-bop lohvu haah vaalu nôôn e, <sup>32</sup> lemu môônd nôôvoow naatok-ambe balup, tombe omaaho ti gako be na baalôôh, ond valup-ambe kaluuh haah pasi-pasiv pin la, de bopaata lak-ambe vaasuh nama salak bop bop tombe manak dahaav vunis hôôk lis-ambe dando hôôk kôôh.”

*Yesu nêêl vakasin pakwesin ngeeyaata  
(Matai 13:34-35)*

<sup>33</sup> Nêêl tanasin lak vakasin pakwesin ngeeyaata nambêênju vu hil lohvu sil akand in nambe yoo le lanjak ni. <sup>34</sup> Vakasin vaalu ond me-nêêl langaah e, yik yoo nêêl tu vakasin pakwesin amu vu hil, tonde having yite maanggêêm-aso

be lala dando lundoos, le mem tatekin vakasin pakwesin-anjuuto pin dangga langaah vu sil.

*Yesu wiing vavi jamba melaas ak  
(Matai 8:23-27; Luk 8:22-25)*

<sup>35</sup> Hôôk busin-anju, ond soosin hôôk atombe Yesu nêel vu yite maanggêem-aso nambe, “Yana betum vaalu.” <sup>36</sup> Om lavuuh hil alu bopaataa-ju be dando, de lalakala kaanu ti sen Yesu lakandôoto be lala. Lako Yesu be lala tonde kaanu heey taamuyin. <sup>37</sup> Tombe vavi jamba laam bopaata be bel têey lukala kaanu lopayo lôôt-ambe wiingin nambe naapup, <sup>38</sup> le Yesu hambe lu lakaneep pilo be neep ka lingin ak kaanu ahus. Tombe maanggêem-aso layêêvu be lanêel vu nambe, “Kaputung-e, yiyy navu aanggimb-anjo. Game gakam navu yiyy e?” <sup>39</sup> Tombe Yesu kandi be nêel vavi yuuh bel nambe, “Lung. Olavam nama de onanggop tatimasin.” Tombe vavi ma la de bel neep tatimasin. <sup>40</sup> Tonde nêel vu sil nambe, “Ham naham nalak in? Nambe vaati om ham-ame awiihaving e?” <sup>41</sup> Tombe kanund la lôôt-ambe lanêel vu sil nambe, “Omaaho tii-jo mak lati ondeey vavi yuuh bel nanyend vuun in lava?”

## 5

*Yesu hatiiy mamu in omaaho ti  
(Matai 8:28-34; Luk 8:26-39)*

<sup>1</sup> Sil latok lala Gelasa-te taaku neep betum vaalu,

<sup>2</sup> + o 5:2 Mak 1:23\*tombe Yesu luus-ambe la, tonde omaaho ti mamu nipaya dahôovu yi ond vu lavandangga sen omaahonôôn bandumb-ato

be hato vu Yesu. <sup>3</sup> Omaahôô-ju yoo nando hôôk lavandangga sen omaahonôn bandumb-ato, de hil-ame lalohvu nambe talu yi le, tonde hees aniwêêk lôôt ond me-lohvu having e. <sup>4</sup> In davu talu yi lak hees aniwêêk osin lasi lok hôôk-ambe napuvu vaha yuuh boyambôôy, le ma de navu taso lôôt atombe hees aniwêêk napuuh, de navu paanyêêh lok-ambe navu kalêêh. Omaaho ti me-lohvu nambe naapuvu be melaas jak e. <sup>5</sup> Nangeeyak-ambe natup hôôk lohvu lavandangga osin kandu nalu ti ti businaandiin osin vandiisinaandiin, de nalaah ninaavi lak tatuuh lohvu busin pin.

<sup>6</sup> Tombe naale diin le yi de Yesu la hato, tombe hatup-ambe la hatung kaatu vu, <sup>7-8</sup> + o 5:7 Mak 1:24\*de Yesu nêêl vu mamu nambe, “Mamu nipaya-e, onggavuuh omaahôô-jo de gana.” Tonde mamu nêêl laah osin lava bopaata nambe, “Anutu baandoni noow Yesu, gayêêvu sa in? Sa naanêêl lak Anutu naambe game gambu nivaane vu sa le.” <sup>9</sup> Tonde Yesu lingin nambe, “Ohaalem nambe?” Le nêêl nambe, “Sa haalengg nambe Omaaho-maaho, nambe hey ngeeyaata lôôt.” <sup>10</sup> Tonde kataangg osin niwêêk vu Yesu nambe me-gatiiy sil lana taaku ngo le.

<sup>11</sup> Tonde bik ngeeyaata mondaya va daale vahandangga ti ngaaho vu taaku-ju, <sup>12</sup> tombe mamu kataangg Yesu nambe, “Gambiing-ambe hey aandukana bik-anju londpayo.” <sup>13</sup> Om Yesu liinggis-ande mamu nipaya lavuuh omaaho sen-anjuuto de lalukala bik alondpayo, tombe bik pin-anju latup-ambe laluu taaku pake be lalukala betum, tombe lanum bel-ambe layimb valok-ate. Bik-anju ngeeyaata lôôt lohvu 2 taosen.

<sup>14</sup> Tonde hil sen danggin bik-ato lapak-ambe lala lanêêl banye vu hil bayêên bop osin bayêên pasiv pin, be lalaam in nambe lanji vaa-ju. <sup>15</sup> Om lalaam vu Yesu be layi omaaho sen mamu Omaaho-maaho lahôôvu boyambôôy-ato, ond lukook anivasa lak-ambe havêêh yite tôômb laah-ande nando, tombe layêênin lôôt. <sup>16</sup> Tombe hil sen layi mend ak vaa-ju ond lala lanêêl va sen Yesu wiing vu omaaho tii-ju osin lanêêl va sen lak bik-ato having. <sup>17</sup> Tombe sil kataangg Yesu nambe gavuuuh silate taakuu-ju de na.

<sup>18</sup> Yesu naahen nalakala kaanu, tonde omaaho sen mamu hôôvu bôôy-ato, ond kataangg nambe, “Sana gaving hong-o.” <sup>19</sup> Le ma de Yesu lonin-ande nêêl vu nambe, “Ganaah gambaam-ambe onaanêêl vu gate hil naambe Omaaho Bop ka pasiv in hong-ambe samu hong lôôt.” <sup>20</sup> + o 5:20 Mat 4:25; Mak 7:31\*Om omaahôô-ju laah-ambe nêêl vakasin sen Yesu samu yi be nivasa lak-ato langaah vu hil lohvu taaku nomaayuuuh sen danêêl nambe Dekapolis-ato, tombe hil pin lavindis lôôt.

*Yailus nowaavêêh ayuuuh vêêh ti sen hambe nama lak Yesu-te lolop-ato*  
(Matai 9:18-26; Luk 8:40-56)

<sup>21</sup> Lako Yesu lak kaanu be laah betum vaalu yesin, tombe nando hôôk bel nanyendangga, de hil ngeeyaata lasupin lala vu yi. <sup>22</sup> Tombe yêêv dumb-ate ti, haale nambe Yailus, yi Yesu tombe la hato pataav baambu neep voon hôôk vaha, <sup>23</sup> + o 5:23 Mat 8:3; Mak 7:32\*de kataangg niwêêk vu yi nambe, “Sa nonggaavêêh nilak bopaata be

navu jimb, om ganaam gambe namam jak yi in nambe nivasa dôôk-ambe mando.” <sup>24</sup> Tombe Yesu la having-ambe yuuh lala, de hil ngeeyaata lambuuh yi vaalu vaalu be lala.

<sup>25</sup> Tonde sim vêêh ti ond vêêh-ate nilakin tovu tombe yoo nando bayêên pasiv nalak busin pin lohvu ta nomaayuuh-ambe laam yuuh, <sup>26</sup> tombe nala vu dokta ngeeyaata in davu samu yi, de navu mone la vu dokta-so boyambôôy-ambe yinêên mone lung la, le ma de me-nivasa nalak e, de yite nilakin tu bopaata. <sup>27-28</sup> + o 5:27-28 Mak 6:56; Mat 14:36\*Tombe hangoyin Yesu banye be ka vu nambe, “Sa gambe namangg jak yite lolop amu ond sale sa ningg vasa dôôk.” Om lukala hil lavuun-ambe naale Yesu dami de hambe nama lak yite lolop, <sup>29</sup> tombe nilakin lung la pavis, de mem hangoyin nambe nivasa lak lung la. <sup>30</sup> + o 5:30 Luk 6:19\*Tombe Yesu lak ni nambe yite niwêêk wiing omaaho ti nivasa lak, om hilin pavis-ambe lingin nambe, “Lati hambe nama lak sate lolop?” <sup>31</sup> Le yite maanggêêm lanêêl vu nambe, “Gahe hil ngeeyaata lambuuh hong tatup-anjo, le sim galingin nambe lati hambe nama lak hong?” <sup>32</sup> Tombe me hako hôôk in nambe ji omaaho ti sen hambe nama lak yii-to, <sup>33</sup> tonde vêêh-anju lak ni nambe Yesu-te niwêêk wiing-ambe nivasa lak om yêênin-ambe hees, tombe hato pataav baambu neep voon hôôk Yesu vaha de nêêl vakasin pin langaah vu yi. <sup>34</sup> + o 5:34 Mak 10:52; Luk 7:50; 17:19\*Tonde Yesu nêêl vu nambe, “Nonggaavêêh, gawii-having ondeey ganim vasa lak, om gana osin galompayo ahelavis in gate nilakin lung la valok-ate.”

<sup>35</sup> Naahen monanêêl atonde omaaheey vu Yailus ambaan-ambe lato lanêêl vu Yailus nambe, “Nomaavêêh ame yip, om onaanêêl vu yêêv naambe mando de menaam e, jip.” <sup>36</sup> Tombe Yesu hango sil lavand atombe nêêl vu yêêv dumb-ate nambe, “Game naham jak e, yik gambiing gaving amu.” <sup>37</sup> Tombe lonin hil pin dando de hako Pita having Jems ayuuh hali Jon-ambe sil lala. <sup>38</sup> Sil latok lala yêêv dumb-anjôto baan, le yi de hil dawiiing nindaandun bopaata osin dasu lôôt. <sup>39</sup> + o 5:39 Jon 11:11\*Tombe Yesu lukala bayêên alo be nêêl vu sil nambe, “Ham nawiiing nindaandun bopaata de ham nasu bopaata lôôt in? Unaavepasiv-ame yimb e, nganjo yoo neep anêên.” <sup>40</sup> Le sil lanop ak yi, om hatiiy sil lala voon-ande hako unaavepasiv mangganaan ayuuh tangganaan osin yite maanggêêm yaal sen laving yii-to be lalukala bayêên alopayo sen unaavepasiv neep hôôk-ato. <sup>41</sup> + o 5:41 Luk 7:14\*Tombe lôôh hôôk unaavepasiv nama de nêêl vu hôôk sil lavand nambe, “Talita kumi,” dangga nambe “Unaavepasiv, sa naanêêl naambe okandi jak.” <sup>42</sup> Tombe yik unaavepasiv kandi lak pavis-ambe naale nala. Layi tombe kanund la lôôt. Unaavepasiv-anju yite ta nomaayuuuh-ambe laam yuuh. <sup>43</sup> + o 5:43 Mak 1:44; 7:36\*De Yesu vu kôôvu sil niwêêk nambe me-daanêêl-ambe omaaho ti me-gango vaa-ju banye le, de nêêl vu sil nambe lambu vanôôn-ambe unaavepasiv-anju ja.

*Hil Nasaalet anind baya in Yesu  
(Matai 13:53-58; Luk 4:16-30)*

<sup>1</sup> Yesu kandi vuu-ju be laah baan, tombe yite maanggêêm-aso taamuyin yi be lala. <sup>2</sup> + o 6:2 Jon 7:15\*Huli-la dumb alo hôök busin sawaasin, tombe wiing tanasin-ambe hil ngeeyaata langoyin-ambe lavindis nambe, “Omaahôô-jo hako tanasin danggakook osin lukook bopaataa-jo vu tana, om sen nawiing taahu taahu osin niwêêk-anjo. <sup>3</sup> + o 6:3 Jon 6:42\*Omaahôô-jo mak yi kaamunda yik Malia noow-anjo, de halindin ond Jems ayuuh Joses de Yudas ayuuh Simon, de vangaandin sen dando having yiyy-anjo.” Tombe sil ahend kalin vu yi. <sup>4</sup> + o 6:4 Jon 4:44\*Le Yesu nêel vu sil nambe, “Omaaho ti nanêel Anutu-te vakasin langaah ond hil dako omaahôô-ju haale lak lohvu taaku pin, lemu hil vu yite baan dangga dosin osin hil sen sil dangga ti be sil ambaand ti, ond sil-ame dako yi lak e.” <sup>5</sup> + o 6:5 Luk 4:40\*Tombe Yesu me-lohvu nambe biing taahu taahu ti vu manyinju le, in hil-ame lawii-having yi le, yik hambe nama lak hil anind lakin lavuuti be nind vasa lak. <sup>6</sup> Yesu vindis in hil-ame lawii-having yi le, tonde la hanjung hôök bayêên bu ti ti be wiing tanasin vu hil.

*Yesu wiing yite sinaale nomaayuuu-ambe laam  
yuuu-ato lala*

*(Matai 10:5-15; Luk 9:1-6)*

<sup>7</sup> + o 6:7 Luk 10:1\*Yesu teey yite maanggêêm nomaayuuu-ambe laam yuuu-ato lalaam vu in nambe biing sil yuyuuu-ambe lana, de vu niwêêk vu sil in nambe sil gatiiy mamu nipaya lana in

omaahonôôn. <sup>8</sup> + o 6:8-11 Luk 10:4-11\* Tonde nêel vu sil nambe sil-ame namand dôök vati be lana mop e, yik sil namand dôök paatôôn timu, de sil-ame gako vanôôn osin vaahes e, de mone me-dumbaale silate gis e, <sup>9</sup> lanjop suul amu de me-lanjop lolop yuuh e. <sup>10</sup> Tonde nêel vu sil nambe, “Ham anjakana bayêên ti, ond yik ham oo mando lak bayêên tii-ju nivalok-ambe na balup busin sen ham gavuuu sil-ato, le mem ham ana taaku ngo. <sup>11</sup> + o 6:11 Sin 13:51\* Naambe hil vu taaku ti me-gako ham jak e, de me-gango ham lavam e, ond ham gavuuu taakuu-ju na, de ham tatehin kambus sen nando lak ham vaham-ato naah in taato silate nipaya langaah.” <sup>12</sup> Tonde mem sil lala lawiing tanasin nambe hil langgilin sil alondpayo, <sup>13</sup> + o 6:13 Jem 5:14\* de latiiy mamu ngeeyaata lala in omaahonôôn, de sil kaasêêh hahaanôôn aniluk lak hil anilakin ngeeyaata be sil anind vasa nalak.

*Jon sen nalipis hil-ato yimb*

*(Matai 14:1-12; Luk 3:19-20; 9:7-9)*

<sup>14</sup> + o 6:14 Mat 16:14; Mak 8:28\* Yesu banye lohvu taaku pin, tombe omaaho lulemak haale nambe Helot, ond hango banye de hil vaalu lanêel nambe, “Jon sen nalipis hil-ato ond kandi lak laah-ambe nando moos om nawiing taahu taahu osin niwêêk.” <sup>15</sup> De hil vaalu lanêel nambe, “Manyinju Eliya sen nanêel Anutu-te vakasin bôôy-ato,” de vaalu lanêel nambe, “Anutu-te omaaho ti lohvu hil sen danêel Anutu-te vakasin langaah bôôy-ato.” <sup>16</sup> Tombe Helot hango de lanêel nambêênju om nêel nambe, “Jon sen



saawiing-ambe omaaho ti katôôv ka laa-to ond yik kandi lak laah-anju.”

<sup>17</sup> In bôôy Helot wiing-ambe lala lalôôh Jon-ambe landuuh-ande latung lukala kalaambus. Wiing nambêênju in dangga nambe Helot hali Pilip ond Helot lakin vane Helodias, <sup>18</sup> + o 6:18 Lev 18:16\*le sim Jon nêêl Helot nambe, “Ohako halim vane om me-lohvu le.” <sup>19</sup> Tombe Helodias ahekalin vu Jon om wiingin nambe nyiis-ambe jimb, le ma de Helot hilin Jon-ambe hako be la hatung hôôk kalaambus. <sup>20</sup> Helot nayêênin Jon in lak ni nambe omaaho nivalok osin vaambuung ti ondeey hilin. Tombe Helot nango Jon-ate vakasin-ambe ka vasa, lemu ka vaalu vaalu lohvu busin pin.

<sup>21</sup> Tombe busin ti Helodias tovu mopaatôôv ti nambe Helot aka vu yite busin sen tangganaan hako yii-to, tombe wiing vanôôn bopaata vu yêêv gaaman-aso pin de yite yêêv ngaamong-ate, osin himbop bop vu Galili pin. <sup>22</sup> Tombe Helodias nowaavêêh lukala vu sil-ambe

nakôômb, tombe Helot-aso hil pin sen daya vanôôn-ato layi be ahend anivasa lôôt vu, om omaaho lulemak Helot nêêl vu vahaavu nambe, “Gawiingin gako vati ond onaanêêl-ambe saambu vu hong. <sup>23</sup> + o 6:23 Esta 5:3,6; 7:2\*Sa naanêêl keen baandoni naambe okataangg vati vu sa ond sale aambu vu hong, de naambe gawiingin nambe saambu sate taaku vaalu be ongganggin, ond yik sale aambu vu hong.” <sup>24</sup> Tombe vahaavu laah-ambe lingin tangganaan nambe, “Sale naanêêl vaati?” Le nêêl nambe, “Okataangg

Jon sen nalipis hil-ato lukook.” <sup>25</sup> Om hatup-ambe lukalaah pavis vu omaaho lulemak-ambe nêel vu nambe, “Saawiingin nambe gambu Jon sen nalipis hil-ato lukook vu sa. Onggattung hôök kaambum ti, be gambu vu sa pavis.” <sup>26</sup> Tombe sim omaaho lulemak Helot lopayo nimeen lôôt, le ma de ka vu nambe me-tatuhin vahaavu le, in taato nama lak baandoni hôök yêêv-aso pin sen dando having yii-to mend, <sup>27</sup> om pavis atombe omaaho lulemak nêel vu hil ngaamong vaha ti nambe na gako Jon alukook naam, om la katôôv ka hôök bayêên kalaambus alo. <sup>28</sup> Tombe hatung Jon alukook hôök kaambum ti le mem hako be laah vu vu vahaavuu-ju, tombe vahaavuu-ju hako be la vu vu tangganaan. <sup>29</sup> Tonde sim Jon-ate maanggêem-aso sen davu sapa yii-to lango banye, tombe lala lako ninaavi be lala lambe neep hôök lavandangga.

*Yesu vaat hil ngeeyaata lôôt lohvu 5 taosen  
(Matai 14:13-21; Luk 9:10-17; Jon 6:1-13)*

<sup>30</sup> + o 6:30 Luk 10:17\*Sinaale-so sen Yesu wiing sil lalaa-to, ond lasupin lalom vu Yesu be latulin va pin sen lawiing osin tanasin sen lanêel-ato vu yi. <sup>31</sup> + o 6:31 Mak 3:20\*Tombe nêel vu sil nambe, “Ham oo anaam-ambe yana mando taaku lundoos ti be ham sawaah daka le.” Nêel nam-bêênjo in hil ngeeyaata lalaam-ambe lahilin sil, de me-lalohvu nambe lanja vanôôn e. <sup>32</sup> Tombe sil lalakala kaanu be sil oo lala taaku lu malis ti, <sup>33</sup> lemu hil ngeeyaata lalak sil anind lung la be layi nambe dala taaku tii-ju, om hil vu taaku pin latup voon-ambe latok lala taaku-ju munggin. <sup>34</sup> + o

6:34 Mat 9:36\*Tombe Yesu lakala lonak, le yi de hil ngeeyaata lôôt dando, tombe ka pasiv in sil in nambe sil lalohvu bik sipsip sen heendin lavuuh sil-ato, om nêêl tanasin ngeeyaata vu sil lôôt.

<sup>35</sup> + o 6:35-44 Mak 8:1-9\*Soosin hôök atombe yite maanggêêm-aso lala lanêêl vu nambe, “Taaku me lung la, de taaku-jo lumbalaamb <sup>36</sup> om gambiing-ambe sil lana bayêên ti ti sen nando ngaahôô-to, be sil baanggo vanôôn in lanja.” <sup>37</sup> Le ma de nêêl vu maanggêêm-aso nambe, “Yik ham oo ambu vanôôn vu sil.” Le lanêêl vu nambe, “Om gawiingin nambe hey ana baanggo vanôôn jak mone 200 kina in sil lanja?” <sup>38</sup> Le sim nêêl vu sil nambe, “Hamate vanôôn nôôn vaaheey naahen nando? Ham ana angge le.” Layi lung la le mem lanêêl vu nambe, “Yik balet namaavaalu having paahuung yuuh neep.” <sup>39</sup> Om nêêl vu hil pin nambe sil gato mando lu ti ti jak taavêêt alis, <sup>40</sup> om sil doo-namaavaalu-vaalu dando lak lu ti ti, tonde lu heey lohvu doo-yuyuuh-ambe nomaayuuh. <sup>41</sup> Tombe mem hako balet namaavaalu de paahuung yuuh-ato be valaah me lak baandoni de lohak, le mem hapok balet-ambe vu vu yite maanggêêm-aso be sil latiiy lohvu hil. Tonde yik kalêêh paahuung yuuh-ato be hatiiy lohvu omaahonôôn pin, <sup>42</sup> tombe omaahonôôn pin laya be lohvu sil.

<sup>43</sup> Laya lung atonde sil lasupin nyengale hôök jaambang nomaayuuh-ambe laam yuuh-ambe pup. <sup>44</sup> Hil sen laya vanôôn-ato ond moow ngeeyaata lôôt lohvu 5 taosen.

*Yesu naale lak bel baandoni be la  
(Matai 14:22-33; Jon 6:15-21)*

<sup>45</sup> Lung atonde Yesu haanjiihin yite maang-gêem-aso nambe lanjâk kaanu be daamunggin-ambe lana taaku Betsaida sen nando betum nanyandangga vaaluu-to, de yoo mando be biing hil lana le.

<sup>46</sup> + o 6:46 Mak 1:35; Luk 5:16; 6:12; 9:28\*Wiing sil lala lung la, tonde mem lak kandu ti be la nando monalohak nandôô-ju. <sup>47</sup> Tombe taaku bus la de kaanu naahen bel lavuun, de Yesu yoo timu nando lonak, <sup>48</sup> le sim yi nambe sil dataal osin nimeen in vavi nave sil lôôt. Tonde hôôk heendiisin atombe naale nala lak bel baandoni be la vu sil, tombe wiingin nambe kaluuh sil, <sup>49</sup> + o 6:49 Luk 24:37\*lemu layi nambe naale nala lak bel baandoni tombe kand vu nambe mamu ti om langeeyak. <sup>50</sup> Sil pin oo layi be layêênin lôôt, om nêel vu sil pavis nambe, "Ham naham aniwêêk, yik saa-jo, om ham-ame anjêênin e." <sup>51</sup> + o 6:51 Mak 4:39\*Tombe lakala kaanu vu sil atonde vavi tôômin om lavindis lôôt, <sup>52</sup> + o 6:52 Mak 8:17\*in sil-ame kand vu be lalak va sen Yesu wiing ak balet osin niwêêk-ato danggakook ani le, lundkook ma.

*Yesu wiing nilakin heey nind vasa lak vu Gene-saalet*

*(Matai 14:34-36)*

<sup>53</sup> Sil latok lala betum vaalu vu taaku Gene-saalet, tombe sil talu kaanu be nando <sup>54</sup> de laluu-ambe lala. Tombe hil-anju lalak Yesu ni pavis, <sup>55</sup> om lala latup hôôk taaku pin-ambe laaku silate hil anilakin lakaneep ak yêênin-ambe lala taaku ti ti sen lango Yesu nandôô-to. <sup>56</sup> Vu taaku

bop-ambe pasiv de bayêên ti ti sen laa-to ond sil latung hil anilakin dando talind, tombe davu kataangg yi nambe gambe namand jak yite lolop anyendaambu mu, tombe mem hil sen lambe namand ak lolop-ato nind vasa lak pin.

## 7

*Anutu-te tanasin savok himbop bôôy-ate tanasin*

*(Matai 15:1-9)*

<sup>1</sup> Palisai osin tanasin dangga heey vu Yelusalem lasupin lala vu Yesu, <sup>2</sup> + o 7:2 Luk 11:38\*tombe layi de yite maanggêêm vaalu laya vanôôn danjeen, de me-lalipis namand e\*. <sup>3</sup> In Palisai osin Yuda pin davu sapa himbop bôôy-ate tanasin nambe sil-ame lanja vanôôn e, lanjipis namand e mem. <sup>4</sup> + o 7:4 Mat 23:25\*Tonde lana maaket-ambe lanaah balup bayêên alo ond lanjipis sil e mem lanja vanôôn. De sil oo davu sapa gambung ngeeyaata having lak va sen dalipis kap ayuuh dêêngg-ambe palêê-to.

<sup>5</sup> Tombe Palisai osin tanasin dangga-so lalingin Yesu nambe, “Nambe vaati sen gate maanggêêm-aso davu kalêêh himbop bôôy-ate tanasin om

---

\* **7:2:** Hil Palisai osin hil Yuda pin yoo davu sapa bundin bôôy-ate gambung, om me-kand navu va ningook keen e, nganjo kand navu vakasin lak hil vaalu sen sil-ame Yudaa-to. Naambe hil Yuda lana mop me lana maaket-ambe namand nôôh va sen hil vaalu datung-ato, ond kand navu nambe hil vaaluu-juuto silate nipaya lakala sil. Om lanom balup bayêên atombe lanjipis sil namand vêêl e mem lanja vanôôn, in kand navu nambe lanja vanôôn danjeen ond hil vaalu sen sil-ame Yudaa-to silate nipaya le dukana sil alondpayo.

daya vanôôn osin namand anipaya?” <sup>6</sup> + o 7:6-7 Ais 29:13\*Tombe nêel vu sil nambe, “Yesaia nêel Anutu-te vakasin lak ham tatuhin ambu-so bôôy-ato ond yoo nêel lohvu, yik kaavu neep nambe, ‘Hil-anjo dako sa haalengg ak avind malis amu, de londpayo nando diin in sa. <sup>7</sup> Dalohak malis amu vu sa, tonde davu taahu hil hôök omaahonôôn oote tanasin nambe sate tanasin keen.’

<sup>8</sup> Om manyinjo ham havuuh Anutu-te tanasin la, de ham oo napuvu omaahonôôn-ate tanasin tatin.” <sup>9</sup> De nêel vu sil having nambe, “Hamambe ham nawiing va nivasaa-jo? Sen ham naluuh damim vu Anutu-te tanasin de mem ham oo napuvu himbop bôôy-ate tanasin tatin. <sup>10</sup> + o 7:10 Eks 20:12; 21:17; Diu 5:16\*Keen, Mose nêel bôôy nambe, ‘Onggako mom ayuuh tam jak.’

De nêel ango neep having nambe, ‘Omaaho ti naanêel vakasin anipaya jak mangganaan me tangganaan, ond hil lanyis-ambe jimb.’ <sup>11</sup> Nganjo ham ond ham nanêel nambe omaaho ti naanêel vu mangganaan me tangganaan naambe bu va na in dôôvu yuuh, le ma de nêel Anutu haale lak lung la, <sup>12</sup> ond ham nanêel nambe lung, omaahô-ju me-dôôvu mangganaan ayuuh tangganaan e. <sup>13</sup> Om nambênja ham oo kawiiy Anutu-te vakasin lak himbop-ate tanasin bôôy sen ham nanêel tave tavêê-to be natu va malis amu, de ham oo nawiing va ngeeyaata lohvu ham akam.”

*Va sen nawiing omaahonôôn anind paya nalak-ato*  
(Matai 15:10-20)

14 Yesu teey hil lala vu yesin-ambe nêêl vu sil nambe, “Ham pin gango sa lavangg-ambe ham anjak ni vanuh. <sup>15</sup> + o 7:15 Sin 10:14-15\*Vanôôn sen lukala omaahonôôn alopayo ond me-lukalaah nambe biing-ambe Anutu ji omaahonôôn naambe nipaya le, malis. Nganjo va sen naale hôôk omaahonôôn alopayo be nalaam-ato ond mem nawiing-ambe Anutu nayi omaahonôôn nambe nipaya. <sup>16</sup> [Omaaho ti nambe nanye neep ond gangoyin.]”

17 Yesu havuuh sil la de lukala bayêên alo, le mem yite maanggêêm-aso lalingin vakasin pakwesin-anju danggakook vu yi, <sup>18</sup> tombe nêêl vu sil nambe, “De ham-anjo, ham-ame alak ni having e? Mak ham doosin vanôôn sen nalukala omaahonôôn alopayôô-to ond me-le biingambe Anutu ji omaahonôôn naambe nipaya lak e, <sup>19</sup> in vanôôn-ame nalukala lopayo keen e, nalukala ahe mu be hato nalukala sov.” Nêêl taato nam-bêênju in nambe vanôôn vaha vaha pin nivasa vu yiy. <sup>20</sup> Nganjo nêêl nambe, “Va sen naale hôôk hil alondpayo be nalaam-ato ond mem nawiing-ambe Anutu nayi omaahonôôn nambe nipaya. <sup>21</sup> + o 7:21-22 Gal 5:19-21\*In va sen vu omaahonôôn alondpayo be nalaam-ato, ond kand navu va nipaya, be dawiiing danjeen vu vahaavu, dahôôndak va, dayiis omaahonôôn dayimb, <sup>22</sup> dawiiing baayamb, dawiiing mend nôôn, dawiiing va nipaya vaha vaha, davu tatuhin omaahonôôn, dawiiing va nindanjeen lôôt, ahend anipaya vu omaaho ango, danêêl vakasin anipaya lak omaahonôôn, dako sil ak, osin dawiiing

va danje-danjeen. <sup>23</sup> Va nipaya pin nambêênja naale hôök omaahonôn alondpayo be nalaam langaah, ond mem nawiing-ambe Anutu nayi omaahonôn nambe nipaya.”

*Vêêh Pinisia ti wii-having Yesu  
(Matai 15:21-28)*

<sup>24</sup> Yesu vu manyinju be la taaku sen bayêên Taia yuuh Saidon neep-ato, tombe huli-la nando hôök bayêên ti be wiingin nambe mando kaatokin de hil-ame lanjak ni le. <sup>25</sup> Le ma de vêêh ti hangoyin nambe nando, tombe la vu pavis. <sup>26</sup> Vêêh-anju yi Glik ti, tangganaan hako neep Pinisia vu Silia-te taaku, ond mamu nipaya ti hôôvu vêêh-anju nowaavêêh, om la hato pataav baambu neep voon hôök Yesu vaha be kataangg nambe gatiiy mamu na in nowaavêêh. <sup>27</sup> Tombe Yesu nêel vu nambe, “Yaambu vanôn vu unoopasiv-ambe lanja vêêl e, de me-lohvu nambe omaaho ti gako unoopasiv-ate vanôn-ambe gaate na vu voow e†.” <sup>28</sup> Tombe nêel laah vu nambe, “Êê-e, Omaaho Bop, manyinja ganêel keen, lemu voow sen daale hôök pêêt ahendangaa-to ond daya unoopasiv-ate vanôn paapu.” <sup>29</sup> Tombe Yesu nêel vu nambe, “Ganêel nambêênjo om lung, de ganaah in mamu nipaya hato la in nomaavêêh.” <sup>30</sup> Om laah valup baan e yi nambe mamu nipaya hato la de un-aavepasiv neep nivasa lak pêêt.

---

† **7:27:** Hil Yuda lanêel hil vaalu sen sil-ame Yudaa-to nambe sil lalohvu voow, om Yesu nêel vakasin pakwesin lak unoopasiv osin voow-anju, ond unoopasiv lohvu hil Yuda, de voow lohvu hil vaalu sen sil-ame Yudaa-to le.



*Yesu wiing omaaho ti nanye katôônd osin ka ngangolangin nivasa lak*

<sup>31</sup> + o 7:31 Mat 15:29-31\*Yesu vu Taia be la valup Saidon, de la be tok la Dekapolis, tonde monala be tok laah betum Galili. <sup>32</sup> + o 7:32 Mak 5:23; Luk 4:40; 13:13\*Tonde sim lako omaaho ti nanye katôônd osin ka ngangolangin la vu Yesu be sil kataangg yi nambe gambe nama jak. <sup>33</sup> + o 7:33 Mak 8:33\*Hil ngeeyaata dando om Yesu hako be yuuh lala lundoos, le mem lop nama kapis lukala omaahô-jû nanye vuun vaalu vaalu, tonde wiing avi luk ak nama kapis-ambe hatung lakando omaahô-jû dalaan, <sup>34</sup> + o 7:34 Mak 6:41; Jon 11:41\*tonde me lak baandoni be sawaah sêên, tombe nêel vu nambe, “Epata,” dangga nambe “Nanyem naatok.” <sup>35</sup> Om nanye tok-ande dalaan ahelavis ak-ambe vakaas nivasa. <sup>36</sup> + o 7:36 Mak 1:43-45\*Tombe Yesu vu kôôvu sil lôôt nambe medaanêel vaa-jû langaah vu omaaho ti le, le ma de sil lanêel langaah lôôt vu omaahonôn pin. <sup>37</sup> + o 7:37 Ais 35:5\*Tombe lavindis lôôt-ambe lanêel nambe, “Wiing va pin nivasa lôôt. Wiing-ambe hil nanyend katôônd dangoyin taaku de kama-so dakaas.”

## 8

*Yesu vaat omaahonôn ngeeyaata lohvu 4 taosen*

*(Matai 15:32-39)*

<sup>1</sup> Hil ngeeyaata lasupin yesin laah atombe vanôn ma, om Yesu teey yite maanggêem-aso lalaam vu be nêel vu sil nambe, <sup>2</sup> + o 8:2 Mak 6:34-44\*“Sa kangg pasiv in hil ngeeyaataa-jo, in

dando having sa lohvu busin yaal de silanêênd vanôôn sen lanjaa-to ma. <sup>3</sup> Naambe saambiing sil lana meep-ambe lanaah baand, ond le sakend nama jak vu mop lavuun, in sil vaalu lalaam vu taaku diin.” <sup>4</sup> Tombe yite maanggêêm-aso lanêêl laah vu yi nambe, “Yale gako vanôôn vu tana be yambaat hil-anjo? Manyinjo taaku lumbalaamb-anjo.” <sup>5</sup> Tombe lingin sil nambe, “Hamate vanôôn nôôn vaaheey naahen nando?” Le lanêêl nambe, “Balet namaavaalu be vindak yuuh nando.” <sup>6</sup> Om nêêl vu hil pin nambe sil gato mando voon, tonde mem hako balet namaavaalu be vindak yuuh-anjuuto be lohak osin pêêlis la vu Anutu, le mem hapok-ambe vu vu yite maanggêêm-aso in nambe sil gatiiy, tombe latiiy lohvu hil pin. <sup>7</sup> Tonde yite maanggêêm-aso lako paahuung anipasiv heey, tombe yik lohak-ande nêêl-ambe sil latiiy lohvu hil pin having. <sup>8</sup> Tombe yik laya be lohvu sil. Laya lung atonde lasupin nyengale hôôk jaambang namaavaalu be vindak yuuh-ambe pup. <sup>9</sup> Omaahonôôn-anju ngeeyaata lôôt lohvu 4 taosen. Yesu wiing hil lala, <sup>10</sup> de pavis atomb having yite maanggêêm-aso be sil lalakala kaanu ti be lala taaku Dalmanuta.

*Palisai tambe Yesu in nambe biing taahu taahu osin niwêêk*

*(Matai 16:1-4; Luk 12:54-56)*

<sup>11</sup> + o 8:11 Mat 12:38\*Palisai lala vu Yesu be lakaas atombe sil davu mahôoh yi, tonde lawiin-gin nambe sahi Yesu om sil tambe nambe biing taahu taahu jak va niwêêk baandoni ti. <sup>12</sup> + o 8:12 Luk 11:29\*Le Yesu sawaah sêên osin lopayo nimeen-ande nêêl nambe, “Hil pin sen dando

gêên-anjo lawiingin nambe lanji taahu taahu in vaati? Sa naanêel vu ham keenaanôn naambe same le aambiing taahu taahu be sil lanji le, malis.” <sup>13</sup> Tonde havuuh sil-ande lak kaanu yesin-ambe la betum vaalu.

*Yesu vu kôovu yite maanggêêm-aso in Palisai osin Helot-ate va nipaya (Matai 16:5-12)*

<sup>14</sup> Yesu-te maanggêêm-aso kand lingin-ande me-lako vanôn e, yik balet nôôn timu nando hôok kaanu lopayo. <sup>15</sup> + o 8:15 Luk 12:1\*Tombe Yesu vu kôovu sil in nambe Palisai osin Helot-ate va nipaya me-na ganggwang sil alondpayo le. Nêel nambe, “Ond ham gango, ham ganggin ham nivasa in Palisai osin Helot-ate yis balet-ate.” <sup>16</sup> Tombe sil oo mondanêel vu sil nambe, “Ke, yame hako balet e, ondeey nêel nambêênju.” <sup>17</sup> + o 8:17 Mak 6:52\*Le Yesu lak ni om nêel vu sil nambe, “Nambe vaati sen ham vakaas danjeen nambe ‘Yame hako balet e?’ Ham-ame alak ni le? Mak ham naahen doosin a? Mak ham alompayo niwêek ak a? <sup>18</sup> + o 8:18 Jer 5:21; Esi 12:2; Mak 4:12; Sin 28:26\*Ham amem neep, le ma de ham-ame ahe le, de ham nanyem neep, le ma de ham-ame hangoyin e. Mak ham akam-ame navu le? <sup>19</sup> + o 8:19 Mak 6:41-44\*Sa hapok balet namaavaalu be saavu lohvu moow 5 taosen-ato, ond ham asupin nyengale hôok jaambang vilis-ambe pup?” Le lanêel vu nambe, “Hey aasupin hôok nomaayuuuh-ambe laam yuuuh.” <sup>20</sup> + o 8:20 Mak 8:6-9\*Tonde yik lingin nambe, “De sa hapok balet namaavaalu be vindak yuuuh-ambe saavu lohvu hil

4 taosen-ato ond ham asupin nyengale hôôk jaambang vilis-ambe pup?” Le lanêel vu nambe, “Hey aasupin hôôk namaavaalu be vindak yuuh.”  
<sup>21</sup> Tonde nêel vu sil nambe, “Le sim ham naahen doosin a?”

*Yesu wiing omaaho mekanu ti nivasa lak vu Betsaida*

<sup>22</sup> Sil lala taaku Betsaida tombe vaheey lako omaaho mekanu ti be lala vu Yesu, be sil kataangg nambe gambe nama jak omaahôô-ju. <sup>23</sup> + o 8:23 Jon 9:6\*Tombe Yesu laandiiy hôôk omaaho mekanuu-to nama be yuuh lala taaku nanyendangga, le mem kasuv lukala mekaalus-ande hambe nama lak, tonde lingin nambe, “Gahe

vaheey a?” <sup>24</sup> Tombe vêel mekaalus lak-ambe nêel nambe, “Sa naahe omaahonôn nambe haah, lemu daale dala.” <sup>25</sup> Tombe Yesu hambe nama lak mekaalus yesin tonde mem yi taaku lôôt, de me tum-ambe yi va pin neep langaah. <sup>26</sup> + o 8:26 Mak 7:36\*Tombe Yesu nambe, “Ganaah gambaam de game gandukanaah taaku Betsidaa-ju le.”

*Pita nêel Yesu langaah nambe yi Kalisi (Matai 16:13-20; Luk 9:18-21)*

<sup>27</sup> Yesu having yite maanggêem-aso be lala in lana taaku Sisalia Pilipai. Daahen dala tonde Yesu lingin yite maanggêem-aso nambe, “Hil danêel nambe sa lati?” <sup>28</sup> + o 8:28 Mak 6:15\*Tombe sil lanêel vu nambe, “Hil vaalu danêel hong nambe Jon sen nalipsis hil-ato, de vaalu danêel

hong nambe Eliya, de vaalu danêê lhong nambe Anutu-te hil sen danêel yite vakasin

langaah-ato ti.” <sup>29</sup> + o 8:29 Jon 6:68-69\*Tombe lingin sil nambe, “De ham-ok? Ham nanêel sa nambe lati?” Le Pita nêel vu nambe, “Hong omaaho sen Anutu yoo holin hong vulôôt in nambe gandôovu hey-ato.” <sup>30</sup> + o 8:30 Mak 9:9\*Tombe Yesu vu kôôvu sil nambe me-daanêel yi langaah vu omaaho ti le.

*Yesu nêel langaah nambe le gako nivaane be jimb*

*(Matai 16:21-28; Luk 9:22-27)*

<sup>31</sup> Yesu nêel taato vu sil nambe, “Omaahonôn Noow e gako nivaane ngeeyaata. Himbop-aso osin kul vaha sen datung salivangin-ato silate yêêv-aso de tanasin dangga-so, ond sil e nind baya in-ande lanyiis-ambe jimb, tonde busin yaal jung na le mem le kandi jak jesin naah.” <sup>32</sup> Nêel langaah nambêênjo om Pita hako yi be yuuh lala daale lundoos, le mem nêel Yesu. <sup>33</sup> Le Yesu hilin-ambe yi yite maanggêem-aso de nêel Pita nambe, “Saalang, gana vêel in sa, in gakam-ame navu va lohvu Anutu ka le, nganjo gakam oo navu va lohvu omaahonôn akand amu.”

<sup>34</sup> + o 8:34 Mat 10:38-39\*Yesu teey hil pin-anju osin yite maanggêem-aso lalaam vu be nêel vu sil nambe, “Omaaho ti wiingin nambe sapa sa, ond yoo daanggôol yi le mem kava yite haah

pako\* be sapa sa. <sup>35</sup> + o 8:35 Luk 17:33; Jon 12:25\*De omaaho ti yoo wiingin nambe ganggin ninaavi nivasa in mando metumin, ond le jimb-ambe na menama osin nôôn metumin-ate. Le naambe omaaho ti baaku nimeen ak sa haalengg osin Anutu-te banye nivasa be jimb, ond mem le mando metumin danggata. <sup>36</sup> Le omaaho ti gôôlis va voon-ate pin, de jimb-ambe na menama osin nôôn metumin-ate, ond va voon-ate me-le dôôvu yi le, le nama. <sup>37</sup> De va voon-ate ti me-neep in nambe omaaho ti me-baanggo kanu jak-ambe mando metumin danggata le, malis. <sup>38</sup> + o 8:38 Mat 10:33\*Hil sen dawiiing va nipaya be dando gêên-anjo, ond ti jêênin omaahonôôn-ande nimbaya in sa osin sate vakasin, de me-naanêel sa haalengg langaah vu hil e, ond busin sen Omaahonôôn Noow nom osin Mangganaan-ate nikaapulis gaving angela vaambuung-asôoto, ond le nimbaya in omaahôô-ju dukanaah.”

## 9

<sup>1</sup> + o 9:1 Mak 13:30\*Yesu nêel vu sil nambe, “Sa naanêel keen vu ham naambe ham sen ham naalêê-jo, ond vaalu me-le lanjimb e, de lanji busin sen Anutu ganggin yite hil-ato naatok naam osin niwêêk e mem.”

---

\* **8:34:** Yêêv Lom-aso danêel nambe omaaho ti wiing va nipaya om lanyis dukanaah nyevahaan-ambe jimb, ond layiis lakala haah pako in nambe bu nimumin vu yi osin yite hil. Tonde Yesu nêel nambe omaaho ti wiingin nambe sapa yi ond yoo baaku yite haah pako be sapa yi, ond dangga nambe yame aanjêênin nimeen osin nimumin sen hil lambu vu yiyi jak Yesu haalêê-to le, yiyi baaku be yiyi oo sapa Yesu.

*Yesu ninaavi angoo yoow ak  
(Matai 17:1-13; Luk 9:28-36)*

<sup>2</sup> Busin namaavaalu be vindak ti la vêel e mem Yesu hako Pita yuuh Jems-ande Jon-ambe sil oo lalak kandu bopaata ti be lala, tombe sil pin-ambe daale, tonde sim Yesu ninaavi angoo yoow ak hôok yaal amend, <sup>3</sup> tombe yite lolop têtêlang nivalôôy lôôt. Omaaho ti me-lohvu nambe jipis lolop-ambe nivalôôy jak naambêênju le. <sup>4</sup> Tombe sim yaal layi de Eliya yuuh Mose daale having Yesu be yaal dakaas. <sup>5</sup> Tombe Pita nêel vu Yesu nambe, “Omaaho Bop, yiy nandôô-jo nivasa lôôt, om waay andaav numang daka yaal, gate ti, Mose-te ti, de Eliya-te ti.” <sup>6</sup> Yaal layêênin lôôt om Pita doosin va sen naanêel-ato ondeey nêel vakasin-anju. <sup>7</sup> + o 9:7 Mat 3:17; 2Pi 1:17-18; Diu 18:15; Sin 3:22\*Tombe sim bayiimb ti vayum sil, tonde lava ti laam hôok bayiimb-anju lopayo nambe, “Sa noongg-anja. Sahengg having yi lôôt om ham gango lava.” <sup>8</sup> Tonde yaal amend hako hôok taaku pavis, le me-layi omaaho ti le, malis, yik Yesu yoo timu naale.

<sup>9</sup> + o 9:9 Mat 12:16; Mak 8:30\*Sil vu kanduu-ju be daahen mondaluus atonde Yesu vu kôôvu yaal nambe me-daanêel va sen layii-to vu omaaho ti le, de Omaahonôôn Noow kandi jak naah vu hil yimbin-ate vêel e mem daanêel. <sup>10</sup> Tombe yaal lawii-having lava, lemu yaal lalingin vu yaal nambe, “Peey e vakasin-anjo danggakook nambe vaati sen nambe kandi jak naah vu hil yimbin-ate?” <sup>11</sup> Om yaal lalingin yi nambe, “Nambe vaati sen tanasin dangga-so danêel nambe Eliya le naamunggin e mem Omaaho Bop naam?” <sup>12</sup> +

o 9:12 Mal 4:5; Saam 22:1-18; Ais 53:3\*Tombe nêêl vu yaal nambe, “De. Eliya le naamunggin in samu va pin dukanaah, lemu nambe vaati sen vakasin neep hôök kaapiya nambe Omaahonôn Noow e gako nivaane bopaata osin hil daanêêl yi pale? <sup>13</sup> + o 9:13 Mat 11:14\*Le sa naanêêl vu ham naambe Eliya laam lung la, le hil vaalu lawiing va nindanjeen vu yi lohvu sil oo kand, nambe sen neep hôök Anutu-te kaapiyaa-to.”

*Yesu wiing unoopasiv ti nivasa lak*

*(Matai 17:14-21; Luk 9:37-43)*

<sup>14</sup> Latok lalaah vu maanggêêm-aso vaalu tombe layi hil ngeeyaata lambuuh sil tatup, de hil tanasin dangga-so dakaas-ambe dayêês sil lôôt. <sup>15</sup> Le sim hil pin layi de Yesu hato, tombe lavindis lôôt-ambe laakôhin-ande latup-ambe lala vu yi pavis. <sup>16</sup> Tombe lingin sil nambe, “Ham nakaas in vakasin vaati?” <sup>17</sup> Tombe sim omaaho ti nêêl vu nambe, “Kaputung, saanggiy sa noongg laam vu hong in mamu ti wiing-ambe ka ma, <sup>18</sup> de naambe busin sen mamu dôôvuu-to ond nôôh-ambe gaate na nanjip voon-ande nyekaakôôs naam, de navu naangitak osin ninaavi ahevaha jak. Tombe sa kataangg gate maanggêêm-aso nambe sil gatiy mamu na, le me-lalohvu le.” <sup>19</sup> Le Yesu nêêl vu sil nambe, “Ham pin-ame awii-having e. Sa mando gaving ham-ambe naangelis e mem ham anjak sate kul ani? De sa gako nimeen in ham na nohvu busin vilis e? Ham gako unoopasiv naam vu sa.” <sup>20</sup> Om lako laam vu yi. Mamu yi Yesu tombe handu unoopasiv pavis-ambe lupake be la neep nahaahin neep voon-ambe nyekaakôôs laam. <sup>21</sup> Tonde Yesu lingin



unopasiv mangganaan nambe, “Nando nam-bêênjo lohvu ta vilis?” Le nêel nambe, “Naahen nipasiv-ato de vaa-jo wiing. <sup>22</sup> Balon ngeeyaata mamu nahôôvu tombe naate nayêê-nala kin osin nalupake lukala bel in nambe nyiis-ambe jimb, om galohvu nambe gambiing ond gakam pasiv in haay-ambe gandôôvu haay.” <sup>23</sup> + o 9:23 Mat 21:21; Mak 11:23\*Tombe Yesu nêel laah vu nambe, “Êê-e, naambe galohvu ond mem, in omaaho ti sen wii-having Anutuu-to, ond lohvu nambe biing va pin nohvu.” <sup>24</sup> + o 9:24 Luk 17:5\*Le unopasiv mangganaan nêel niwêêk pavis nambe, “Saawii-having, lemu gandôôvu sa in saambiing gaving niwêêk lôôt.”

<sup>25</sup> Yesu yi nambe hil ngeeyaata lasupin lalaam lôôt, tombe nêel mamu nipaya nambe, “Mamue, gawiing-ambe unopasiv-anjo nanye katôônd osin ka maa-to, om sa naanêel vu hong naambe onggevuuuh yi de gana, de game gandukanaah jesin naah e.” <sup>26</sup> + o 9:26 Mak 1:26\*Tonde mamu hangeeyak-ande handu unopasiv lôôt, tonde hato be la, de unopasiv neep nambe sen omaahonôôn yimbin-ato, om hil vaalu lanêel nambe, “Yimb la.” <sup>27</sup> Le Yesu laandiiy hôök nama be kandi naale. <sup>28</sup> Tonde Yesu having yite maanggêêm-aso be lalukala bayêên alo, tombe sil lalingin nambe, “Nambe vaati sen hey-ame aalohvu nambe gatiiy mamu na le?” <sup>29</sup> Le Yesu nêel vu sil nambe, “Lohakin timu ond mem lohvu nambe gatiiy mamu nambêênju na, de vaheey ond me-lohvu le.”

*Yesu nêêl balon ango having nambe le jimb-  
ande kandi jak*

*(Matai 17:22-23; Luk 9:43-45)*

<sup>30</sup> + o 9:30 Jon 7:1\*Sil vu manyinju be lala osin Galili be lala, tombe Yesu nimbaya nambe hil-ame lanjak ni le, <sup>31</sup> + o 9:31 Mak 8:31; 10:32-34\*in nanêêl taato vu yite maanggêêm-aso nambe omaaho ti navu bu Omaahonôôn Noow dukana hil namand in lanyiis-ambe jimb. Lanyiis-ambe jimb jung na, tonde busin yaal e mem kandi jak jesin naah. <sup>32</sup> + o 9:32 Luk 18:34\*Le maanggêêm-aso doosin vakasin dangga om layêênin nambe me-lanjingin yi le.

*Omaaho lati bop?*

*(Matai 18:1-5; Luk 9:46-48)*

<sup>33</sup> Sil latok lala taaku Kapenaum tombe lalukala bayêên alo le mem Yesu lingin maanggêêm-aso nambe, “Ham nanêêl vaati lôôt vu mopaatôôv lavuun-ambe ham nalaam?” <sup>34</sup> + o 9:34 Luk 22:24\*Le sil lavand ma, in daahen davu tatuuvu mopaatôôv-ato ond sil dayêês sil nambe sil ti tana tu lukook bop vu ango-so. <sup>35</sup> + o 9:35 Mat 20:25-27; Mak 10:43-44\*Tombe hato nando le mem supin sil nomaayuuh-ambe laam yuuh-ato be nêêl vu sil nambe, “Omaaho ti wiingin nambe naatu bop naamunggin ango-so, ond yoo naah taamu be biing va naambe sen yi omaaho malis ti in dôôvu sil pin.” <sup>36</sup> Tombe laandiiy unoopasiv ti laam naale hôôk sil lavuun, be lôôh ak-ambe kava, le mem nêêl vu sil nambe, <sup>37</sup> + o 9:37 Mat 10:40\*“Omaaho ti ka bu sa haalengg-ambe gako unoopasiv naambêênjo ti jak ond lohvu hako sa

lak. Tombe omaaho ti sen hako sa lak-ato ond me-hako sa lak e, nganjo hako omaaho sen wiing sa laam-ato lak.”

*Hil sen me-dayi yiy payaa-to ond manyinjo yate hil*

*(Luk 9:49-50)*

<sup>38</sup> + o 9:38 Nam 11:27-29\* Tonde Jon nêêl vu nambe, “Kaputung-e, hey aahe omaaho ti natiy mamu lak ohaalem, le ma de hey aanêêlin yi in nambe yame yate hil ti le.” <sup>39</sup> + o 9:39 1Ko 12:3\* Le Yesu nêêl nambe, “Ham-ame naanêêlin yi le, in nambe omaaho ti nawiing taahu taahu osin niwêêk jak sa haalengg, ond me-lohvu nambe naanêêl vakasin anipaya jak sa pavis e, malis. <sup>40</sup> + o 9:40 Mat 12:30; Luk 11:23\* In hil sen me-dayi yiy payaa-to ond manyinjo yate hil. <sup>41</sup> + o 9:41 Mat 10:42\* Naambe omaaho ti bu bel kuuh vu ham in ham naanum in dangga nambe Kalisite hil ham, ond sa naanêêl keenaanôn vu ham naambe omaahôn-ju le gako yite samu samu nivasa nyevahaan dukanaah.”

*Va nipaya nawiing nipaya vu hil*

*(Matai 18:6-9; Luk 17:1-2)*

<sup>42</sup> “Naambe omaaho ti taahu va nipaya vu sate unoopasiv-aso sen londpayo nalaam timu vu saato ti be biing va nipaya, ond le naatokak nyevahaan bopaata vu taamusin, ond hil talu tatuuh bopaata dôôk omaahôn-ja ka naamunggin-ambe gaate dukana lôôy-ambe davin na, ond mem nivasa in me-taahu omaahônôn dôôk va nipaya le. <sup>43</sup> + o 9:43 Mat 5:30\* De naambe onamam vaalu biing-ambe

va nipaya kape hong, ond okatôôv na de onamam vaalu bati mu, ond mem nivasa in gale gana mando metumin danggata. Le naambe omando osin onamam yuuh ahondoos, ond gale gana taaku nipaya sen kin neep natum danggataato. <sup>44</sup> [Taaku nipaya sen-anju ond male monaya sil lohvu busin pin-ande me-le jimb e, de kin ond vaheey-ame le daapuv jimb e, yoo le nanjip naatum danggata.] <sup>45</sup> De naambe ovaham gako hong-ambe gandukana va nipaya, ond okatôôv na de ovaham vaalu bati mu, ond mem nivasa in gale gana mando metumin danggata. Le naambe omando osin ovaham yuuh ahondoos, ond le gaate hong dukana taaku nipaya. <sup>46</sup> [Taaku nipaya sen-anju ond male monaya sil lohvu busin pin-ande me-le jimb e, de kin ond vaheey-ame le daapuv jimb e, yoo le nanjip naatum danggata.] <sup>47</sup> + o 9:47 Mat 5:29\*De naambe gamem kaalus vaalu taato va nipaya vu hong-ambe gandupake hôôk va nipaya, ond okayovakin-ambe onngaate na de gamem vaalu bati mu, ond mem nivasa in gale gandukana gaving Anutu-te hil. Le naambe gamem kaalus yuuh ahondoos nanjip, ond le gaate hong dukana taaku nipaya. <sup>48</sup> + o 9:48 Ais 66:24\*Taaku nipaya sen-anju ond male monaya sil lohvu busin pin-ande me-le jimb e, de kin ond vaheey-ame le daapuv jimb e, yoo le nanjip naatum danggata. <sup>49</sup> Kin e na jaliv hil pin naambe sen gaas naliv vanôôn-ato. <sup>50</sup> + o 9:50 Mat 5:13; Luk 14:34; Kol 4:6; Lom 12:18; 1Tes 5:13\*Gaas ond va nivasa, lemu naambe gaas anikuuh ak ond yale aambiing vaati vu be naatu nanyêên jesin naah? Gaas jaliv ham ond mem ham mando

javuh ti nivasa.”

## 10

*Yesu nêel tanasin lak hil dako vêêh-ambe dapuuh-ato*

*(Matai 19:1-12; Luk 16:18)*

<sup>1</sup> Yesu havuuh taakuu-ju de la taaku Yudia be la bel Yoladan vaalu, tombe hil ngeeyaata lasupin lala vu yi yesin, be nawiing tanasin vu sil nambe sen yoo nawiing-ato. <sup>2</sup> Tombe sim hil Palisai heey lala vu yi in nambe sahi lopayo, om lalingin nambe, “Naambe omaaho ti bapuu vane na, ond lohvu tanasin me ma?” <sup>3</sup> Le lingin laah vu sil nambe, “Om Mose vu tanasin nambe vaati vu ham?” <sup>4</sup> + o 10:4 Diu 24:1-4; Mat 5:31\*Tombe lanêel nambe, “Mose liinggis nambe omaaho ti kaavu kaapiya ti naambe bapuu vane na, ond bapuu.” <sup>5</sup> + o 10:5 Jen 1:27; 5:2\*Le Yesu nêel vu sil nambe, “Mose lak ni nambe ham alompayo niwêêk ak ondeey kaavu vakasin-anju lohvu ham oo kam, <sup>6</sup> lemu vu munggin sen Anutu hatung va pin nyendoos-ato, ond hatung omaahonôn, samu moow ayuuh vêêh. <sup>7</sup> + o 10:7 Jen 2:24; Ep 5:31\*Om moow gavuu mangganaan ayuuh tangganaan de gako vêêh-ambe yuuh mando javuh ti, <sup>8</sup> be mem yuuh daatu nôôn timu, de yuuh-ame yuuh e, nganjo yuuh latu nôôn timu. <sup>9</sup> Om va sen Anutu wiing-ambe tu nôôn timu-to, ond omaahonôn-ame kahe le.”

<sup>10</sup> Lung laa tonde sil lalaah bayêên alo, le mem Yesu-te maanggêem-aso lalingin yi in vakasin-anjo, <sup>11</sup> + o 10:11 Mat 5:32; 1Ko 7:10-11\*le nêel vu sil nambe, “Naambe moow ti gavuu vane na

de gako vêêh ango, ond wiing baayamb. <sup>12</sup> De naambe vêêh ti gavuuu laya na de jak vu moow ango, ond yik wiing baayamb.”

*Yesu lohak unoopasiv  
(Matai 19:13-15; Luk 18:15-17)*

<sup>13</sup> Hil lako unoopasiv laam vu Yesu in nambe gambe nama jak sil, le yite maanggêem-aso lanêêl sil. <sup>14</sup> Le Yesu yi tombe ahekalin vu yite maanggêem-aso be nêêl vu sil nambe, “Ham baale de unoopasiv-anju lanaam vu sa le. Ham-ame anggilin sil e, in Anutu nanggin hil nambêênja having. <sup>15</sup> + o 10:15 Mat 18:3\*Sa naanêêl keen vu ham naambe omaaho ti me-gulis Anutu baambu naambe unoopasiv-anju le, ond me-le dukana gaving Anutu-te hil e.” <sup>16</sup> Tonde kava unoopasiv ti ti lak-ambe hambe nama lak sil de lohak ak sil.

*Omaaho sen yite va ngeeyaata  
(Matai 19:16-30; Luk 18:18-30)*

<sup>17</sup> Yesu la in nambe na taaku ti, tonde omaaho ti hatup-ambe la hatung kaatu vu de lingin nambe, “Kaputung anivasa, saambiing vaati le mem sa mando metumin danggata?” <sup>18</sup> Tombe Yesu nêêl vu nambe, “Ganêêl sa nambe nivasa in? Omaaho ti me-nivasa le, Anutu timu nivasa. <sup>19</sup> + o 10:19 Eks 20:12-17; Diu 5:16-20; 24:14; Jem 5:4\*Galak tanasin ani nambe, ‘Game ganyiis omaahonôn jimb e, game gambiing baayamb e, game gambiing hôndak e, game tatuhin vakasin jak omaaho ango le, game tatuhin omaaho ango de onggako yite va le, onggako mom ayuuu tam jak.” <sup>20</sup> Le nêêl vu Yesu nambe, “Kaputung, sa naahen unoopasiv-ande sa samu va pin-anja

lôôt-ambe gêên-anjo.” <sup>21</sup> + o 10:21 Mat 10:38; 6:20; Mak 8:34\*Tombe Yesu yi be ahe having, de nêêl vu nambe, “Le va timu naahen, ganaah-ambe gambu gate va pin na be hil baanggo, de gambu mone na vu hil sen dativak in va yuuh amêê-to in mem gale gako nôôn nivasa vu baandoni, tonde ganaam taamuyin sa.” <sup>22</sup> Hango vakasin-anju tombe me luus voon de laah osin lopayo nimeen, in yite kupak ngeeyaata nando. <sup>23</sup> + o 10:23 Mak 4:19; 1Ti 6:17\*Tombe Yesu me hako hôôk yite maanggêêm-aso, le mem nêêl vu sil nambe, “Hil sen silate va ngeeyaataa-to ond le lanôôhin in nambe landukana gaving Anutu-te hil.” <sup>24</sup> Tombe yite maanggêêm-aso lavindis in vakasin-anju, le Yesu nêêl vu sil yesin laah nambe, “Noongg-aso-e, omaahonôôn le lanôôhin in landukana gaving Anutu-te hil.

<sup>25</sup> “Bik kamel ti me-lohvu nambe dukana lulak vuun e, le nôôhin, de hil sen silate va ngeeyaataa-to, ond yik me-lalohvu nambe landukana gaving Anutu-te hil e, le lanôôhin lôôt.” <sup>26</sup> Tombe lavindis bopaata lôôt-ande lanêêl nambe, “Om omaaho lati lohvu nambe mando metumin danggata?” <sup>27</sup> + o 10:27 Iyop 42:2; Mak 14:36\*Tombe Yesu me la vu sil-ande nêêl nambe, “Omaahonôôn-ame lalohvu va nambêênjo le, lemu Anutu lohvu. Anutu timu yoo lohvu biing va pin.” <sup>28</sup> Tombe Pita nêêl vu nambe, “Gangge, hey-anjo ond hey havuuh heyate va pin la de hey navu taamuyin hong.” <sup>29</sup> Tombe Yesu nêêl nambe, “Sa naanêêl keen vu ham naambe omaaho ti sen havuuh yite bayêên, me halindin, me vangaandin, me tangganaan ayuuh mangganaan, me noondin,

me ngaanggis in sa haalengg osin sa banyengg anivasaa-to, <sup>30</sup> ond le gako bayêên-ambe halindin osin vangaandin, de taandin-ambe noondin osin ngaanggis ngeeyaata dukanaah vu voon-anjo, lemu hil e lambiing nindanjeen vu yi gaving, tonde vu busin taamusin ond le mando metumin danggata osin danggata. <sup>31</sup> + o 10:31 Mat 20:16; Luk 13:30\*De hil sen lamunggin-ato ond ngeeyaata le lanaah taamu, de hil sen davu taamuu-to ond ngeeyaata le lana daamunggin.”

*Yesu nêêl tu balon yaal nambe le jimb  
(Matai 20:17-19; Luk 18:31-34)*

<sup>32</sup> Yesu having yite maanggêêm-aso be lalu-lala in lana Yelusalem. Yesu munggin nalu tombe maanggêêm-aso davu taamuyin yi osin nahand nalak, de hil sen davu taamuyin sil-ato layêênin. Tonde Yesu supin maanggêêm nomaayuuh-ambe laam yuuh-ato yesin, be nêêl va sen navu naatovu yii-to vu sil nambe, <sup>33</sup> + o 10:33-34 Mak 8:31; 9:31\*“Ham gango le,

yiiy navu ana balup Yelusalem atombe hil davu lambu Omaahonôn Noow dukana kul vaha sen datung salivangin-ato silate yêêv-aso osin tanasin dangga-so namand, be daanêêl naambe lanyiis-ambe jimb, de lambu yi dukana hil vaalu sen sil-ame Yudaa-to namand <sup>34</sup> be sil pale yi de kasuv jak, de gaveek yi, de lanyiis-ambe jimb, tonde busin naatu yaal e mem kandi jak jesin naah.”

*Jems ayuuh Jon lawiingin nambe daatu bop  
(Matai 20:20-28)*

<sup>35</sup> Sebedi noow Jems ayuuh Jon lala vu Yesu be yuuh lanêêl vu nambe, “Kaputung-e, haay



aawiingin nambe kataangg hong in vakasin ti.” <sup>36</sup> Tombe lingin yuuh nambe, “Mawiingin nambe kataangg sa in vakasin vaati?” <sup>37</sup> Tombe yuuh lanêel vu nambe, “Ond haay kataangg hong in taamusin omando nivasa osin ohaalem bopaataa-to, ond lohvu nambe gambiing-ambe haay naatu gate yêêv bop yuuh in haay ango mando onamam vasa, de ango mando onamam kêênj gaving hong a?” <sup>38</sup> + o 10:38 Mak 14:36; Luk 12:50\*Le Yesu nêel vu yuuh nambe, “Va sen muuh navu kataangg-anja ond muuh doosin dangga. Kap nimeen-ate sen sa navu naanum hôôk-anjo, ond malohvu nambe naanum hôôk a? Me malohvu manjipis bel naambe sen sa navu aanjipis a?” <sup>39</sup> + o 10:39 Sin 12:2; Taato 1:9\*Le yuuh lanêel vu nambe, “De. Haay aalohvu.” Tombe Yesu nêel vu yuuh nambe, “Nimeen sen sa navu baakuu-to ond male baaku, de nivaane sen sa navu gakôô-to ond male gako, <sup>40</sup> lemu vakasin sen manêel nambe muuh naatu yêêv-ambe muuh mando sa namangg vasa osin sa namangg kêênj gaving saa-to, ond same sate va in nambe sa naanêel e, nganjo hil sen Anutu samu taaku vu sil-ato, ond sil e mando jak.”

<sup>41</sup> Maanggêêm nomaayuuh-ato langoyin vakasin-anju tombe sil alondpayo nipaya vu Jems ayuuh Jon, <sup>42</sup> + o 10:42 Luk 22:25-26\*tombe Yesu teey sil lala vu yi be nêel vu sil nambe, “Ham alak ni nambe hil vaalu-te yêêv sen danggin sil-ato, ond danêel vakasin osin niwêêk-ambe daanggôôl silate hil, de silate himbop oo danggin sil niwêêk lôôt, <sup>43</sup> + o 10:43 Mat 23:11; Mak 9:35\*lemu

ham ond ham-ame ambiing naambêênju le. Nganjo ham ti wiingin nambe naatu bop, ond yoo biing va naambe sen yi omaaho malis ti in dôôvu ham pin. <sup>44</sup> De omaaho ti wiingin nambe naatu hamate lukook-ambe naamunggin, ond yoo naatu ham pin-ate hil kul malis amu. <sup>45</sup> + o 10:45 1Ti 2:5-6\*In Omaahonôôn Noow-ame laam in nambe omaahonôôn lambiing kul vu yi le, nganjo laam in nambe biing kul vu omaahonôôn osin jimb in baanggo omaahonôôn ngeeyaata naah.”

*Yesu wiing-ambe Batimai me nivasa lak  
(Matai 20:29-34; Luk 18:35-43)*

<sup>46</sup> Lung atonde Yesu having yite maanggêêm-aso be lala lato bayêên Yeliko be lala, tombe hil ngeeyaata lala taamuyin sil. Tombe Timai noow Batimai mekanu be nando hôôk mop nanyendangga in mokataangg hil in va. <sup>47</sup> + o 10:47 Mat 9:27; 15:22\*Le sim hango banye nambe Yesu Nasaalet hatu, tombe teey la vu nambe, “Yesu, hong sen gate danggakook neep vu Devit-ato, gakam pasiv in sa.” <sup>48</sup> Tombe hil ngeeyaata lanêêl yi nambe, “Olavam nama.” Le ma de teey bopaata lôôt nambe, “Hong sen gate danggakook neep vu Devit-ato, gakam pasiv in sa.” <sup>49</sup> Tombe Yesu naale be nêêl vu sil nambe, “Ham naateey naam.” Om lateey la vu omaaho mekanuu-to be lanêêl vu nambe, “Galompayo niwêêk jak, okandi in Yesu teey hong.” <sup>50</sup> Tombe omaahôô-to haate yite tôômb la de kandi pavis-ambe la vu Yesu, <sup>51</sup> tombe Yesu lingin yi nambe, “De gawiingin nambe saambiang vaati vu hong?” Le mekanu

nêêl vu nambe, “Omaaho Bop, gambiing-ambe sa mengg naatum.” <sup>52</sup> + o 10:52 Mak 5:34\*Tombe Yesu nêêl vu yi nambe, “Ganaah, in gawii-having keen om gamem anivasa lak.” Tombe yik me tum pavis-ambe mosapa Yesu loh mopaatôôv.

## 11

*Yesu la valup Yelusalem lohvu omaaho lulemak ti*

*(Matai 21:1-11; Luk 19:28-40; Jon 12:12-19)*

<sup>1</sup> Sil lalup ngaaho vu bayêên Betpaasi yuuh Betaani vu kandu Oliv, in nambe daatok na Yelusalem, le mem Yesu wiing yite maanggêêm yuuh nambe yuuh daamunggin-ambe lana.

<sup>2</sup> Tombe nêêl vu yuuh nambe, “Mana be mandukana bayêên-anju ond male angge pavis naambe sil talu donggi noow ti naale, omaahonôôn-ame dalak bôôy e, ond muuh kavaayin-ambe muuh gako be manom. <sup>3</sup> De omaaho ti jingin muuh naambe, ‘Muuh nawiing vaatii-ja?’ ond muuh naanêêl vu naambe, ‘Omaaho Bop wiingin nambe biing kul ti jak pavis e mem gako nom.’”

<sup>4</sup> Tombe yuuh lala lalup-ambe yuuh layi donggi noow ti naale voon, sil talu vatinin vinavi, tombe yuuh kavaayin.

<sup>5</sup> Tombe hil sen daalêê-juuto lanêêl

vu yuuh nambe, “Muuh navu kavaayin donggi noow-anja in mambiing vaati vu?” <sup>6</sup> Le yuuh lanêêl vu sil nambe sen Yesu nêêl-ato, tombe laliinggis nambe yuuh gako donggi be lana. <sup>7</sup> Om yuuh lako donggi noow laah hatu vu Yesu, tombe yuuh lakaah lolop-ambe lavaah lakala donggi

dami, le mem Yesu lakando be la. <sup>8</sup> Tonde hil ngeeyaata lakaah silate lolop-ambe lavaah neep mopaatôôv, de vaalu lasap haah nama osin lis-ambe lambe neep mop, <sup>9</sup> + o 11:9 Saam 118:25-26\*tombe hil vaalu lamunggin, de vaalu taamu be sil pin daakôôhin nambe,

“Ham-o, yiiy gako Anutu haale jak. Anutu biing samu samu vu omaahôô-ju in laam ak Omaaho Bop haale. <sup>10</sup> Anutu biing samu samu vu yi in laam in ganggin yiiy naambe sen yate himbop Devit nanggin yate hil bôôy-ato. Yiiy gako Anutu haale jak nanjip baandoni.”

<sup>11</sup> Tonde Yesu tok la Yelusalem-ambe lukala Anutu-te dumb bop alo be yi va pin lung la, le mem soosin hôôk om giyy yite maanggêêm nomaayuh-ambe laam yuuh-ato be sil lala Betaani.

*Yesu talôôt haah bangguk  
(Matai 21:18-19)*

<sup>12</sup> Sil kandi vu Betaani hôôk samiinaanôôn-ambe daahen dalaam, tonde Yesu yimb ahe. <sup>13</sup> + o 11:13 Luk 13:6\*Tombe me la yi haah bangguk ti, ond lis bambu bopaata lôôt naale dinaandiin, om la ngaaho be yi nambe nôôn heey naale ond ja, le ma de lis malis amu, in yite busin sen nyiis nôôn-ato naahen. <sup>14</sup> + o 11:14 Mak 11:20\*Tombe nêel vu haah nambe, “Game ganyiis nôôn jesin naah-ambe hil lanja le, nama lôôt.” De yite maanggêêm-aso daale dango.

*Yesu hatiiy hil sen daanggo va hôôk Anutu-te dumb bop alôô-to  
(Matai 21:12-17; Luk 19:45-48; Jon 2:13-22)*

15 Sil lala lalup Yelusalem atombe Yesu lukala Anutu-te dumb bop alo be hatiiy hil sen daanggo va salivangin-ate hôök dumb alopayôô-to be lala voon, tonde hil sen davu Yuda osin Lom-ate mone nyevaha-vahaan hôök yii-to\*, having hil sen daanggo manak tumbaliiy in hil gatung naatu salivangin-ato, ond kayovakin silate tavol ayuuh sia, 16 de nêêlin nambe omaaho ti megako va be noh dumb alo jesin naah e. 17 + o 11:17 Ais 56:7; Jer 7:11\*Tombe nêêl-ambe tatekin vu sil nambe, “Anutu-te vakasin sen sil kaavu neep hôök kaapiyaa-to ond nêêl nambe, ‘Sate bayêên ond le daanêêl naambe hil pin-ate bayêên lohakin,’ le ma de ham awiing-ambe tu hil hôöndak-ate bayêên sen dahôôpis hôök-ato.” 18 + o 11:18 Mak 14:1; Luk 22:2\*Tombe kul vaha sen datang salivangin-ato silate yêêv-aso osin tanasin dangga-so langoyin-ambe davu salo mop in nambe lanyiiis Yesu be jimb, lemu layêênin yi, in hil pin lavindis in yite tanasin.

19 De soosin hôök atombe Yesu having yite maanggêêm-aso lavuuh bayêên bop-ande lalaah.

*Yesu nêêl tanasin lak haah bangguk bambôôv-ato*

*(Matai 21:20-22)*

20 + o 11:20 Mak 11:14\*Samiinaanôôn atombe laloh vahand yesin laah, tombe sim layi haah bangguk-ato bambôôv valok-ate. 21 Om Pita ka vu vakasin vasêên-ato be nêêl nambe, “Kaputung-e,

---

\* **11:15:** Hil davu Yuda osin Lom-ate mone nyevaha-vahaan hôök yi, ond dangga nambe yêêv-aso danêêlin Lom-ate mone nambe hil-ame gatung dukana salivangin e, sil oo gatung Yuda-te mone nivalok.

gangge ni. Bangguk sen otalôôt-ato ond bambôôv la valok-ate.” <sup>22</sup> Tombe Yesu nêêl vu sil nambe, “Yik ham ambiing gaving Anutu. <sup>23</sup> + o 11:23 Mat 17:20; Luk 17:6\*Sa naanêêl keen vu ham naambe omaaho ti nambe naanêêl vu kanduu-jo naambe ‘Okandi jak-ambe gandukana lôôy,’ le me-naanêêl osin ka yu-yuuh e, yoo biing gaving keen naambe yite vakasin e nôôn jak, ond mem le nôôn jak. <sup>24</sup> + o 11:24 Mat 7:7\*Om sa naanêêl vu ham naambe va pin sen ham navu kataangg vu Anutu hôôk lohakin-ato, ond ham ambiing gaving naambe ham hako nôôn lung la ond ham e gako nôôn. <sup>25</sup> + o 11:25 Mat 5:23; 6:14-15\*Ham awiingin nambe anohak, lemu hamate vakasin ti neep vu omaaho ti, ond ham kawiiy na le, in Mom sen nando baandonii-to ond le kawiiy hamate nipaya na naambêênja. <sup>26</sup> [Le naambe ham-ame kawiiy omaaho ango-te nipaya na le, ond Mom sen nando baandonii-to me-le kawiiy hamate nipaya na le, malis.]”

*Lalingin Yesu nambe laam nawiing kul lak lati haale*

*(Matai 21:23-27; Luk 20:1-8)*

<sup>27</sup> Lala lalup Yelusalem yesin laah tombe Yesu la hatup hôôk Anutu-te dumb bop alopayo. Tombe kul vaha sen datung salivangin-ato silate yêêv-aso osin tanasin dangga-so be himbop-aso lala vu yi, <sup>28</sup> tombe lalingin yi nambe, “Lati nêêl-ambe galaam nawiing va pin-anjo? Onawiing kul-anjo lak lati haale?” <sup>29</sup> Tombe Yesu nêêl laah vu sil nambe, “Om saanjingin ham in vakasin ti be ham naanêêl nom vu sa le, mem sale naanêêl omaaho sen sa naawiing kul lak haalêê-to nos vu ham.

<sup>30</sup> De Jon nalipis hil-ato ond lati nêêl? Anutu nêêl, me omaahonôôn yoo lanêêl? Ham naanêêl vu sa le.” <sup>31</sup> Tombe sil oo lakaas in nambe,

“Yiyy naanêêl naambe Anutu nêêl, ond le naanêêl vu yiyy naambe, ‘Le nambe tana hamame awii-having yi le?’ ” <sup>32</sup> Tombe lawiingin daanêêl naambe omaahonôôn lanêêl-ambe Jon nalipis hil, lemu dayêênin hil, in omaahonôôn pin lako Jon ak nambe yi omaaho sen nanêêl Anutu-te vakasin langaah-ato keen. <sup>33</sup> Om lanêêl laah vu Yesu nambe, “Bey, hey doosin.” Tombe Yesu nêêl vu

sil nambe, “Om same le naanêêl omaaho sen sa naawiing kul lak haalêê-to vu ham e.”

## 12

*Vakasin pakwesin lak hil anipaya sen danggin kul wain-ato*

*(Matai 21:33-46; Luk 20:9-19)*

<sup>1</sup> + o 12:1 Ais 5:1-2\*Yesu nêêl vakasin pakwesin-anjo vu sil nambe, “Omaaho ti vaalôôh kul wain ti be vaaku ayak hilin de haav taaku sen davu samu wain-aanôôn aniluk hôôk-ato, tonde haav bayêên vaha salak ti in nambe hil baale hôôk-ambe mend in kul wain-anju, tombe mem vu kul-anju lukala hil vaalu namand-ambe sil danggin, tonde yik la taaku dinaandiin lôôt. <sup>2</sup> De wain linj-ambe yiis nôôn-ambe suuh, tombe kul mangganaan wiing yite hil kul ti la vu hil sen danggin kul wain-ato in nambe gako yite nôôn vaalu. <sup>3</sup> Le ma de hil sen danggin kul-ato lalôôh-ambe laveek, tonde latiiy laah-ambe la nama malis. <sup>4</sup> Tonde kul mangganaan wiing omaaho ango laah, le ma

de layiis lukala lukook de lawiing nindanjeen vu.  
<sup>5</sup> Tombe yik wiing omaaho ti laah yesin, le ma de layiis-ambe yimb, de lawiing nambêênju vu yite hil ngeeyaata having, laveek vaalu, de layiis vaalu be layimb. <sup>6</sup> + o 12:6 Mat 3:17\*De kul mangganaan ayuuh noow timu sen ahe having yii-to yuuh oo dando, om wiing-ambe la vu sil in ka vu nambe, ‘Manyinjo sa noongg, om sil e lanjêênin yi.’ <sup>7</sup> Lemu hil sen danggin kul wain-ato lanêêl vu sil nambe,

‘Omaaho sen-anju le gako mangganaan-ate va pin, om ham-o, yaanyiis-ambe jimb-ande kul-anjo naatu yate va.’ <sup>8</sup> + o 12:8 Hiblu 13:12\*Om lalôôh-ambe layiis-ambe yimb, le mem laate la voon. <sup>9</sup> Om kul wain mangganaan e biing vaati? Le balup-ambe nyiis hil sen danggin kul wain-anjuuto de bu kul-anju be hil vaalu ganggin. <sup>10</sup> + o 12:10-11 Saam 118:22-23; Sin 4:11\*Mak ham-ame asevin Anutu-te vakasin-anjo mava? Nambe, ‘Tatuuh ti sen hil kul-aso nind baya nambe melandaav bayêên ak e, ond gêên tu bayêên ahelasu-te kook aniwêêk. <sup>11</sup> Omaaho Bop wiing vaa-jo be yaahe nambe yoo nivasa nôôn.’ ”

<sup>12</sup> Yesu nêêl lung atonde yêêv-aso lalak ni nambe nêêl vakasin pakwesin-anjo lak sil, om lawiingin nambe lanôôh yi, le ma de layêênin hil ngeeyaataa-ju, om lavuuh yi de lala.

*Lalingin Yesu in gaate taakis vu Sisa  
 (Matai 22:15-22; Luk 20:20-26)*

<sup>13</sup> + o 12:13 Mak 3:6\*Lawiing Palisai vaalu laving Helot-ate hil heey lala vu Yesu, be sil sahi yi



in nambe naanêêl vakasin ti na paya ond daanêêl lak me bulôôt. <sup>14</sup> Om lalaam-ambe lanêêl vu yi nambe, “Kaputung, hey alak ganim nambe

hong omaaho sen onanêêl vakasin keen. Game nayêênin omaaho ti nambe haale bop me haale pasiv e, malis. Yik goo navu tatekin Anutu-te mop keen-ato langaah, om onaanêêl vu hey e. Lohvu nambe yiy gaate taakis na vu Lom-ate yêêv bop Sisa me malis? <sup>15</sup> Yale gaate, me jip?” Le Yesu lak silate vakasin tatuhin-anju ni, om nêêl vu sil nambe, “Nambe vaati sen ham nawiingin nambe sahi saa-jo? Ham ambu mone ti naam saangge le.” <sup>16</sup> Om lavu mone ti la vu be yi, le mem nêêl vu sil nambe, “Lati kanu osin haale lakaneep-anjo?” Le lanêêl vu nambe, “Sisa.” <sup>17</sup> + o 12:17 Lom 13:7\*Tombe Yesu nêêl vu sil nambe, “Om ham ambu Sisa-te va vu Sisa, de Anutu-te va vu Anutu.” Tombe lavindis in yite vakasin.

*Lalingin Yesu in hil yimbin kandi jak naah-ato  
(Matai 22:23-33; Luk 20:27-40)*

<sup>18</sup> + o 12:18 Sin 23:8\*Hil heey danêêl nambe omaahonôôn yimbin-ame le kandi jak naah e, ond danêêl hil-anju nambe hil Sadusi, ond Sadiusii-ju lala vu Yesu be lanêêl nambe, <sup>19</sup> + o 12:19 Diu 25:5\*“Kaputung, Mose kaavu tanasin in nambe yiy sapa dôôk, ond kaavu ti nambe omaaho ti yimb-ande havuuh vane nando de noow ma, ond omaahôô-ju hali le gako vane ve-haahôôv-anju in yuuh gako unoopasiv dukanaah mangganaan sen yimb-ato ahembaan. <sup>20</sup> Om hil o halindin namaavaalu be vindak yuuh dando,

tombe sil halindin tuk hako vêêh ti be yimb de noow ma, <sup>21</sup> om sil halindin

miin hako vехаahôôv-anju tombe yimb de noow ma, tombe yik gwey wiing nambêênju va timu. <sup>22</sup> Sil o halindin namaavaalu be vindak yuuh sen lako vêêh timuu-juuto layimb pin, de sil noondin ma, tonde vехаahôôv yimb lakaneep ahus. <sup>23</sup> Om vu busin sen omaahonôôn yimbin kandi jak naah-ato, ond vехаahôôv-anju le naatu sil ti tana vane, in sil namaavaalu be vindak yuuh lako vêêh timuu-ju lung laa-to.” <sup>24</sup> Le sim Yesu nêêl vu sil nambe, “Ôôye, ham doosin Anutu-te ni-wêêk osin yite vakasin sen lukaneep kaapiyaa-to ondeey ham nakaas paya. <sup>25</sup> Vu busin sen omaahonôôn yimbin kandi jak naah-ato, ond moow ayuuh vêêh-ame le gako sil naah e, le nama, sil e mando nohvu angela-so sen dando baandonii-to. <sup>26</sup> + o 12:26 Eks 3:2,6\*Vakasin lak omaahonôôn yimbin kandi jak naah-ato ond ham-ame asevin sen Mose kaavuu-to mava? Vakasin daka lak haah aniyin sen kin natum hôôk-ato, ond Anutu nêêl vu Mose nambe, ‘Abalaam ayuuh Isak-ande Yaakop, yaalate Anutu sa.’ <sup>27</sup> Le hamambe yaal layimb om yaal lala valok-ate? Malis, in Anutu ond hil metumin vu voon osin hil pin sen layimb-ambe lala dando metumin-ato silate Anutu yi. Ham nakaas paya lôôt.”

*Tanasin ti sen kaluuh tanasin pin-ato  
(Matai 22:34-40; Luk 10:25-28)*

<sup>28</sup> Tanasin dangga-so ti laam-ambe hangoyin-ande dakaas lôôt, tombe hangoyin vakasin sen Yesu nêêl laah vu sil-ato be nivasa lôôt, om lingin Yesu nambe, “Tanasin ti tana savok tanasin

pin?” <sup>29</sup> + o 12:29 Diu 6:4-5\*Le Yesu nêêl laah vu yi nambe, “Tanasin danggakook ti nyendoos-ato ond savok tanasin pin, nambe ‘Ham Islel, ham gango. Omaaho Bop sen yate Anutuu-to ond yi Omaaho Bop timuu-ju, <sup>30</sup> om ham ahem gaving Omaaho Bop hamate Anutu osin ham alompayo doos, be ham kanum doos, be ham akam na doos osin ham animwêêk na doos vu yi timu.’ <sup>31</sup> + o 12:31 Lev 19:18; Gal 5:14; Lom 13:9; Jem 2:8\*De tanasin ango neep nambe, ‘Ham ahem gaving hil sen dando ngaaho vu ham naambe sen ham ahem oo naving ham-ato.’ Tonde tanasin pin ond ti me-kaluuh yuuh-anjo la le.” <sup>32</sup> + o 12:32 Diu 4:35; Ais 45:21\*Tombe tanasin dangga tii-ju nêêl vu nambe, “Kaputung, ganêêl keen nambe Anutu ond yoo timu, de Anutu ango me-nando le. <sup>33</sup> + o 12:33 Diu 6:5; 1Sml 15:22; Hos 6:6\*Om yahengg gaving yi osin yalonggpayo doos, de yakangg sapa yi osin yaninggwêêk doos na vu yi, be yahengg gaving hil sen dando ngaaho vu yiy naambe sen yahengg oo naving yiy-ato. Yiy sapa tanasin yuuh-anjo ond mem kaluuh salivangin sen dasi lak kin nala vu Anutu osin salivangin sen yiy natung vu Anutuu-to pin.” <sup>34</sup> Yesu hango de nêêl vakasin osin ka nîvasa om nêêl vu nambe, “Ngaaho lak in Anutu ganggin hong gaving yite hil.” Tombe sim hil pin layêênin om me-lalingin yi in vakasin heey yesin laah e.

*Kalisi-te danggakook neep vu lati?*

*(Matai 22:41-46; Luk 20:41-44)*

<sup>35</sup> Yesu wiing tanasin hôôk Anutu-te dumb bop alo nambe, “Nambe vaati sen hil tanasin dangga-

so danêel omaaho sen Anutu yoo holin yi vulôôt in nambe dôôvu yiyi-ato nambe yite danggakook neep vu Devit? <sup>36</sup> + o 12:36 Saam 110:1\*Le Vavi Vaambuung vêêl Devit alu lak-ambe nêel nambe, ‘Omaaho Bop nêel vu sate Omaaho Bop nambe, “Omando sa namangg vasa, de sale aambiing-ambe hil sen dayi hong payaa-to le langgulis hong vaalu kambi.” ’

<sup>37</sup> + o 12:37 Luk 19:48\*Om sen Devit nêel omaahô-ju nambe Omaaho Bop, le nambe vaati sen Omaaho Bop-anju tu Devit-ate hil moos ti\*?” Tombe hil pin langoyin-ambe londpayo nivasa.

*Hil ganggin sil in tanasin dangga-so*

*(Matai 23:1-36; Luk 11:37-54; 20:45-47)*

<sup>38</sup> Yesu wiing tanasin vu hil nambe, “Ham ganggin ham in tanasin dangga-so, in sil oo lawiingin nambe lanjop lolop dinaandiin-ambe ganjung noh talind in nambe omaahonôn gako sil jak, <sup>39</sup> osin sil lana mando hil pin amend vu dumb alo, de vanôn bop ond sil oo mando nalu munggin. <sup>40</sup> Dalakin vahaahôv-ate bayêen de davun londpayo lak lohakin diin, om nipaya nyevahaan e naatovu sil bopaata lôôt.”

*Vahaahôv hatung salivangin*

*(Luk 21:1-4)*

<sup>41</sup> + o 12:41 2King 12:9\*Yesu nando ngaaho vu taaku sen datung salivangin-ato be monayi hil

---

\* **12:37:** Yesu nêel Devit-ate vakasin-anju in nambe bêel sil alund jak in kand bu naambe omaaho sen Anutu yoo holin yi vulôôt in nambe dôôvu yiyi-ato ond yite danggakook neep vu Devit lemu yite niwêek kaluuh Devit la, ondeey Devit nêel nambe Omaaho Bop.

dalup-ambe datung salivangin, ond yi de kupak dangga-so ngeeyaata daate mone bop. <sup>42</sup> Tombe yi vahaahôôv ti, yinêên va ma, ond valup-ambe haate yite mone noow daka yuuh, <sup>43</sup> + o 12:43 2Ko 8:12\*om teey yite maanggêêm-*aso* lalaam-ambe nêêl vu sil nambe, “Sa naanêêl keen vu ham naambe vahaahôôv-*anju* ond yinêên va ma, lemu hatung salivangin-*anju* kaluuh omaahonôôn pin, <sup>44</sup> in sil pin-*anju* va ngeeyaata nando, le lako pasivdaka-daka be latung salivangin ak, de vahaahôôv-*anju* yinêên va ma, lemu haate yite mone pin lukala tu salivangin, de ti me-nando vu yi in baanggo vanôôn jak-ambe ja le.”

## 13

### *Anutu-te dumb bop e kawiiy* (*Matai 24:1-2; Luk 21:5-6*)

<sup>1</sup> Yesu vu Anutu-te dumb bop alo be lukalaam voon in na, tombe yite maanggêêm ti nêêl vu yi nambe, “Kaputung, gangge ni, lahaav dumb bop-*anjo* lak tatuuh amengali be nivasa lôôt.” <sup>2</sup> + o 13:2 Luk 19:44\*Le Yesu nêêl laah vu nambe, “Gahe dumb bop-*anja*, ond tatuuh ango me-le mando jak ango baandoni le, le kawiiy pin-ambe na mando danjeen.”

### *Vakasin lak nimeen ngeeyaata* (*Matai 24:3-14; Luk 21:7-19*)

<sup>3</sup> Yesu nando lak kandu lu Oliv de Anutu-te dumb bop neep vaalu, tombe Pita yuuh Jems-*ande* Jon ayuuh Endru, sil yumbeyuuh-*anju* yoo lalaam-ambe lalingin yi nambe, <sup>4</sup> “Onaanêêl vu hey e, naangelis e vaa-*jo* naatok? Yale anjak ni

lak vaati naambe vakasin pin navu nôôn jak?”  
<sup>5</sup> Tombe Yesu nêel vu sil nambe, “Ham ganggin ham in omaaho ango le tatuhin ham. <sup>6</sup> + o 13:6 Jon 5:43\*Hil ngeeyaata le lanaam-ambe daanêel sa haalengg ak sil naambe ‘Sa Kalisii-jo,’ de sil e tatuhin omaahonôôn ngeeyaata. <sup>7</sup> De ham e gango ngaamong laam ngaaho daandun, osin ham e gango ngaamong banye vu taaku dinaandiin heey, ond ham-ame naham jak e, in vaa-ju le naam, lemu va pin-ame le jung na pavis e, in busin sen-ato naahen. <sup>8</sup> + o 13:8 Ais 19:2; 2Kro 15:6\*Bayêen bu ango le kandi be lambiing ngaamong vu bayêen bu ngo, de gaaman ango le kandi be biing ngaamong vu gaaman ango, de jemaapi le jêey osin meep biing omaahonôôn nohvu taaku ti ti, ond va nime-meen pin sen navu naatokak omaahonôôn-ato yite nalu munggin-anja. <sup>9</sup> + o 13:9 Mat 10:17-20\*Lemu ham ganggin ham in sil e lambu ham dukana kaansol-aso namand, be sil e gaveek ham baale dumb alo, de sil balaah ham baale yêêv bop osin lulemak-aso mend in sate hil ham, om ham e naanêel sa banyengg langaah vu sil. <sup>10</sup> Tombe hil daanêel banye nivasa be na nohvu taaku pin e. <sup>11</sup> + o 13:11 Luk 12:11-12\* + o 13:11-13 Mat 10:19-22\*Tonde lanôôh ham-ambe gako be lana in ham ambiing vakasin, ond ham-ame naham jak pavis e, de ham akam-ame bu naambe, ‘Sale naanêel vaati?’ Vu busin-anju ond Anutu yoo le bêel ham alum jak in vakasin-ambe mem ham naanêel vu sil, in nambe mem ham-ame yoo naanêel hamate vakasin ti le, ham e naanêel Vavi Vaambuung lava. <sup>12</sup> Tonde omaahonôôn e lambu halindin

dukana hil namand-ambe lanyiiis sil-ambe lanjimb, de yik maandin lambiing naambêênju vu noondin. Tonde yik unoopasiv e lanji maandin ayuuh taandin paya be lambu sil dukana hil namand-ambe lanyiiis sil-ambe lanjimb. <sup>13</sup> + o 13:13 Jon 15:18-21\*Tonde hil pin e nind baya lôôt in ham in sate hil ham, tombe hil sen sil baale niwêêk lôôt-ambe baaku nimeen pin-ato, ond sil e lana mando metumin gaving Anutu.”

*Va nipaya osin va nimeen e naatovu hil  
(Matai 24:15-28; Luk 21:20-24)*

<sup>14</sup> + o 13:14 Dan 9:27; 11:31; 12:11\*Omaaho ti nambe naasevin vakasin-anjo ond yoo ka bu nivasa be jak vakasin-anjo dangga ni, naambe “Ham navu angge nipaya dangga sen navu kawiiy vaa-to baale langaah hôôk taaku sen va nipaya me-baan-ato le, om hil sen dando Yudiaa-to dapak-ambe lana mando kandu lu. <sup>15</sup> + o 13:15 Luk 17:31\*De omaaho ti nambe mando lak bayêên alu baandoni, ond me-duus-ambe guli-naah bayêên alo be gako yite vati le. <sup>16</sup> De ti mon-ambiing yite kul ond me-gilin-ambe naah gako yite lolop e. <sup>17</sup> + o 13:17 Luk 23:29\*Dôôk busin-anju ond nimeen e naatovu vêêh-aso sen noondin lukaalêê-to osin vêêh vaalu sen daahen davu sum vu noondin-ato. <sup>18</sup> Om ham anohak naambe vaju me-naatovu ham dôôk busin sen lukaahôômb osin vavi jambaa-to le. <sup>19</sup> + o 13:19 Dan 12:1; Joel 2:2; Taato 7:14\*Vu bôôy sen Anutu hatung va pin nyendoos-ambe tok laam gêên-anjo, ond omaahonôôn-ame laaku nimeen bopaata lôôt e.

De vu gêên-anjo ond nimeen bopaata navu naatovu omaahonôôn, tonde vu taamusin ond omaahonôôn-ame le daatovu nimeen ti naambêênjo jesin naah e. <sup>20</sup> Busin sen nimeen naatovu omaahonôôn-ato, ond Omaaho Bop e katôôv vahaan na, le naambe nama, ond omaaho lati lohvu nambe mando metumin? Nganjo ka navu yite hil sen yoo holin sil-ato, om le katôôv busin sen nimeen-anju vahaan na.

<sup>21</sup> “Tonde omaaho ango daanêêl vu ham dôôk busin-anju naambe, ‘Ham angge, Kalisi nando nganjo,’ de

daanêêl naambe, ‘Ham angge, nando nganju,’ ond ham-ame ambiing gaving e. <sup>22</sup> + o 13:22 Diu 13:1-3; Taato 13:13\*De hil vaalu le lanaamambe tatuhin naambe sil Kalisi, tonde vaalu le tatuhin naambe sil Anutu-te hil sen danêêl yite vakasin-ato, de lambiing taahu taahu vaha vaha osin niwêêk, in naambe lohvu ond sil langgilin hil sen Anutu yoo holin sil-ato be lambiing gaving sil. <sup>23</sup> Om ham ganggin ham in vakasin pin sen saanêêl banye vu ham-anjo.”

*Omaahonôôn Noow e nom*  
(Matai 24:29-31; Luk 21:25-28)

<sup>24</sup> + o 13:24-25 Ais 13:10; 34:4; Taato 6:12-14; 8:12\*“Va nimeen pin-anju jung na le mem taaku mekaalus e mekanu dôôk, de kwaav-ame le naatum e, <sup>25</sup> de matam baandoni naatok osin va niwêêk vu baandoni pin e baale ye-yêêy. <sup>26</sup> + o 13:26 Taato 1:7\*Va sen-anju pin jung na le mem hil e lanji Omaahonôôn Noow naam hôôk bayimb alo, ond le naam osin niwêêk bopaata gaving nikaapulis. <sup>27</sup> + o 13:27 Mat 13:41\*Tombe le biing



yite angela-so lana daasupin hil sen yoo holin sil lak-ambe latu yite hil-ato vu taaku lavuun osin vu taaku nanyendanga vaalu vaalu de vu baandoni pin.”

*Mêêl suusin nêêl busin taato  
(Matai 24:32-35; Luk 21:29-33)*

<sup>28</sup> “Ham akam bu mêêl \* suusin. Ham angge naambe manak pulapul valu-la ond ham anjak ni naambe ngaaho lak in yiyi kape mêêl jakana jok. <sup>29</sup> Nambêênja om ham angge naambe vakasin pin-ato nôôn ak ond ham anjak ni naambe omaahô-to laam ngaaho lak in navu naatovu ham. <sup>30</sup> De sa naanêel keenaanôn vu ham naambe hil sen dando gêên-anjôto ond me-le lanjimb e, de va pin-anjo le nôôn jak e mem. <sup>31</sup> Yendak osin ngaanggis e na menama, de sate vakasin ond ti me-le na menama le, yoo le nanjip danggata.”

*Ham mando mem naatum in ham doosin busin  
(Matai 24:36-44; Luk 17:26-30,34-36)*

<sup>32</sup> + o 13:32 Sin 1:7\*“Lemu busin-anju osin taaku me ond omaaho ti me-lak ni le, angela baandoni doosin, Anutu Noow doosin, Aamangg timu yoo lak ni lung la. <sup>33</sup> + o 13:33-34 Mat 25:13-14\*Om ham ganggin ham-ambe ham oo mando mem naatum, in ham doosin nambe vaa-ju le nôôn jak dôok busin ti tana. <sup>34</sup> Nambe sen

---

\* **13:28:** Yesu tatekin yite vakasin-anjo vu yite hil ond taahu lak silate hahaanôn ti haale nambe pik, le hey pakwe vakasin-anjo lak mêêl in nambe mêêl ond yiyi oo yate va om yalak ni. De hey kaavu lak yiyi oo yate va vaalu having nambêênjo, in yiyi oo alak silate mopaatôv ani lung la.

omaaho ti navu gavuuu baan mando de kandi be na taaku dinaandiin ti, tombe nêel vu yite hil kul vaha-so nambe sil ganggin yite va pin, om hatiiy kul ti ti lohvu sil, tonde nêel vu ti sen ganggin vinavii-to nambe, ‘Goo baale mem naatum.’ <sup>35</sup> + o 13:35 Luk 12:36-38\*Om yik nambêênja ham oo mando mem naatum in ham doosin nambe bayêên mangganaan e nom gato hôok soosin me busin lavuun me heendiisin me langaah jak e mem nom gato. <sup>36</sup> Om ham mando mem naatum in le nom gato pavis, ond ji nambe ham-ame nahop la le. <sup>37</sup> Vakasin sen saanêel laas vu ham-anjaato ond saanêel vu omaahonôn pin nambe ham oo mando mem naatum.”

## 14

*Davu salo mop in nambe lanyiis Yesu be jimb  
(Matai 26:1-5; Luk 22:1-2; Jon 11:45-53)*

<sup>1</sup> + o 14:1 Mak 11:18; Hiblu 11:28\*Busin laam ngaaho lak in nambe busin yuuh gaving le mem hil daasupin lanaam-ambe lanji busin bop busin haluusin sen Anutu haluuh hil Islel hôok vu Ijip bôôy-ato. Busin-anju ond hil datongin balet lemu me-datung yis nalukala le, nganjo daya balet amu. De kul vaha sen datung salivangin-ato silate yêêv-aso osin tanasin dangga-so davu salo mop in nambe lanôôh Yesu kaatokin be lanyiis-ambe jimb, <sup>2</sup> lemu lanêel nambe, “Yame aanôôh dôok busin bop e, in mak hil ngeeyaata londpayo le naakund.”

*Vêêh ti kaasêêh bel galovasa lak Yesu lukook  
(Matai 26:6-13; Jon 12:1-8)*

<sup>3</sup> + o 14:3 Luk 7:37-38\*Yesu lakala omaaho ti baan vu Betaani, omaahôô-ju haale nambe Simon, ond payêês anipaya lak yi. Dando mondaya vanôôn, tonde vêêh ti hako bel galovasa hôôk buayo tatuuh ti, daanggo lak mone bopaata lôôt, ond la hato be kaatuuh buayo avi de kaasêêh bel galovasaa-ju lak Yesu lukook. <sup>4</sup> Tombe hil sen dando having-ato ond vaalu londpayo nipaya vu, om yoo lanêêl vu sil nambe, “Vêêh-anju nawiliyak bel-anjo in?” <sup>5</sup> Tombe lanêêl vêêh-anjo nambe, “Bel galovasaa-jo yaambu be omaaho ngo baanggo jak mone bopaata nohvu 300 kina, de monêê-jo yaambu vu hil sen silanêênd va maato ond mem nivasa.” <sup>6</sup> Le Yesu nêêl nambe, “Jipin vêêh-anju, ham-ame naanêêl yi le, manyinjo samu sa nivasa lôôt. <sup>7</sup> + o 14:7 Diu 15:11\*Hil sen dativak in va yuuh amêê-to ond sil e mando gaving ham nohvu busin pin, om ham akam bu naambe ham andôôvu sil ond ham oote va, nganjo sak same le mando gaving ham nohvu busin pin e. <sup>8</sup> + o 14:8 Jon 19:40\*Vêêh-anjo wiing lohvu lopayo be kaasêêh bel galovasa lak sa ningg naavii-jo, ond taahu sanêêngg busin kanu sen saanggimb-ambe landaav saa-to. <sup>9</sup> Sa naanêêl keen vu ham naambe vu taaku pin sen hil danêêl banye nivasa langaah-ato, ond va sen vêêh wiing-anjo le daanêêl gaving, in hil akand bu yi.”

*Yudas Iskaliot nêêl Yesu langaah  
(Matai 26:14-16; Luk 22:3-6)*

<sup>10</sup> Sil nomaayuuhambe laam yuuh-ato ti Yudas Iskaliot la vu kul vaha sen datang salivangin-ato silate yêêv-aso in nambe bu Yesu dukana sil

namand. <sup>11</sup> Sil langoyin vakasin sen Yudas nêêl-ato be ahend anivasa lôôt, tombe lanêêl nambe le lambu mone vu yi, om Yudas salo mop in nambe bu Yesu dukana sil namand.

*Yesu ya vanôôn busin haluusin having yite maanggêêm-aso*

*(Matai 26:17-25; Luk 22:7-14,21-23; Jon 13:21-30)*

<sup>12</sup> + o 14:12 Eks 12:6,14-20\*Busin bop busin haluusin sen Anutu haluuh hil Islel hôôk vu Ijip bôôy-ato, ond hil datongin balet lemu medatung yis nalukala le, nganjo daya balet amu, tonde hôôk yite busin nyendoos ond dayiis bik sipsip noow-ambe dasi. Tombe Yesu-te maanggêêm-aso lalingin yi nambe, “Gawiingin hey ana samu taaku sen gangga vanôôn busin haluusin mandôô-to vu tana?” <sup>13</sup> Tombe Yesu wiing yite maanggêêm yuuhapim lala de nêêl vu yuuh nambe, “Mana bayêên bop-anju ond male naatovu moow ti kava bel hôôk dêêngg, ond muuh taamuyin yi be mana. <sup>14</sup> Tombe bayêên ti sen dukanaa-to ond mandukana gaving-ambe muuh naanêêl sa naambe sa kaputung vu bayêên-anju mangganaan-ambe manjingin naambe sanêêngg bayêên alo sen sangga vanôôn busin haluusin gaving sate maanggêêm-aso ham-anja neep ond taato vu muuh. <sup>15</sup> Tombe le taato bayêên alo bopaata ti neep baandoni ond latongin lung la be neep, ond muuh samu yate vanôôn hôôk bayêên alo tii-ju.” <sup>16</sup> Tombe maanggêêm ayuuh lala. Yuuh lala lato bayêên-anju be yuuh layi lohvu sen Yesu nêêl vu yuuh-ato, tombe

mem yuuh samu silate vanôôn busin haluusin.

17 De busin hôök atombe Yesu having sil nomaayuuh-ambe laam yuuh-ato be mem lala bayêên-anjuuto. <sup>18</sup> + o 14:18 Saam 41:9\*Sil dando mondaya vanôôn atombe Yesu nêel nambe, “Sa naanêel keen vu ham naambe ham sen yiy naha vanôôn hôök tii-jo, ond ham ti navu bu sa dukana hil sen lanyiis saa-to namand.” <sup>19</sup> Maanggêêm-aso langoyin vakasin-anju, tombe londpayo nimeen, om sil ti ti lanêel vu yi nambe, “Om sa, me?” <sup>20</sup> Tombe Yesu nêel laah vu sil nambe, “Ham nomaayuuh-ambe laam yuuh-ato ti sen haay ahondoos naha vanôôn hôök kaambum timuu-jo. <sup>21</sup> Omaahonôôn Noow e jimb nohvu vakasin neep hôök Anutu-te kaapiyaa-to, lemu omaaho sen bu Omaahonôôn Noow dukana hil namand-ato ond le gako nimeen, de naambe tangganaan-ame gako omaahô-jâ le, ond mem nivasa\*.”

*Yesu vu paasa vu yite maanggêêm-aso  
(Matai 26:26-30; Luk 22:15-20; 1 Kolint 11:23-25)*

<sup>22</sup> Daahen mondaya vanôôn, tonde Yesu lôôh balet ak-ambe lohak vu Anutu, le mem hapok-ambe vu vu sil, de nêel nambe, “Ham gako naas, manyinja sa ningg naavi.” <sup>23</sup> Tonde lôôh kap wain ak-ambe lohak osin pêêlis la vu Anutu, de vu be sil pin lanum hatup hôök. <sup>24</sup> + o 14:24 Eks 24:8; Sek 9:11; Jer 31:31-34; 1Ko 10:16; Hiblu 9:20\*Le mem nêel vu sil nambe, “Manyinja sa ningg hees-anja, sa kaasêeh in nambe dôôvu hil

---

\* **14:21:** Yesu nêel nambêênju in naanêel taato naambe Yudas tangganaan-ame gako yi le ond mem nivasa, in me-le gako nivaane bopaata vu busin taamusin e.

ngeeyaata, de biing-ambe Anutu-te vakasin sen jôôy lung la be neep-ato nanjip niwêêk. <sup>25</sup> Om sa naanêêl keen yu ham naambe same le naanum wain nôôn aniluk ti jesin naah e, de na nohvu busin taamusin e mem sale naanum moos naah gaving Anutu-te hil.” <sup>26</sup> Tonde lawiing laalo ti lung la, le mem laluuus-ambe lala kandu Oliv.

*Yesu nêêl nambe Pita le jak alu in yi  
(Matai 26:31-35; Luk 22:31-34; Jon 13:36-38)*

<sup>27</sup> + o 14:27 Mak 14:50; Sek 13:7\*Yesu nêêl vu sil nambe, “Ham pin e lompayo nimeen-ambe ham gavuuuh sa, nohvu Anutu-te vakasin neep hôôk kaapiyaa-to nambe, ‘Sa navu aanyiiis bik sipsip-asote heendin de sipsip-aso gavuuuh taale.’” <sup>28</sup> + o 14:28 Mat 28:16; Mak 16:7\*Lemu sale kandi jak naah-ambe sana Galili naamunggin ham.” <sup>29</sup> Tombe Pita nêêl vu nambe, “Sil pin e londpayo nimeen-ambe gavuuuh hong, de sak le nama.” <sup>30</sup> Le Yesu nêêl vu nambe, “Sa naanêêl keen vu hong naambe peey busin-anjo kokalêêh-ame le naasu balon yuuh e, de gale ganjak alum in sa balon yaal vêêl e.” <sup>31</sup> + o 14:31 Jon 11:16\*Lemu Pita nêêl niwêêk lôôt nambe, “Same le anjak alungg in hong e, yik lanyiiis sa be saanggimb gaving hong ond lung.” Tombe yik sil pin lanêêl nambêênjo having.

*Yesu lohak vu taaku Getesmaane  
(Matai 26:36-46; Luk 22:39-46)*

<sup>32</sup> + o 14:32 Jon 18:1\*Lala lato taaku ti haale nambe Getesmaane, tombe Yesu nêêl vu yite maanggêêm-aso nambe, “Ham mandôô-jo de sana aanohak vêêl e.” <sup>33</sup> Tombe hako Pita yuuh

Jems-ande Jon-ambe sil lala. Yesu lopayo nimeen-ambe nahees lôôt, <sup>34</sup> + o 14:34 Jon 12:27\*om nêêl vu yaal nambe, “Sa longgpayo nimeen lôôt lohvu saanggimb, om maal mandôô-jo ond maal oo mem naatum.” <sup>35</sup> De hataah la diin daka, be la hato pataav baambu neep voon-ande lohak nambe Anutu yoo le ji naambe lohvu ond yoo le nôôh va nimeen sen navu naatovu yii-jôôto na. <sup>36</sup> + o 14:36 Lom 8:15; Gal 4:6; Mak 10:38; Jon 6:38\*Nêêl nambe, “O Aamangg, galohvu nambe gambiing va pin om ganôôh kap nimeen-atêênjo vêêl in sa, lemu same naanêêl e, goo gate va.”

<sup>37</sup> Tombe laah hato vu yaal, le yi de yaal deep, tombe nêêl vu Pita nambe, “Simon, onahop a? Game galohvu nambe omando mem naatum daka le? <sup>38</sup> + o 14:38 Luk 11:4; Mat 6:13\*Yik ham mando mem naatum-ambe ham anohak in palapin vaha me-kape ham e. Ham alompayo nawiingin, lemu ham anim naavi nitambo.”

<sup>39</sup> Tonde yik laah-ambe lohak vakasin-anjuuto yesin laah. <sup>40</sup> Lo-hato be yi le yaal deep in mend animeen lôôt, de vakasin sen yaal daanêêl naah vu yii-to ma. <sup>41</sup> Tombe lo-hato vu yaal tu balon yaal yesin-ambe nêêl vu yaal nambe, “Maal naahen nahop a? Lung-anja, de busin sen lambu Omaahonôôn Noow dukana hil anipaya namandato ond ngaaho lak, <sup>42</sup> om ham kandi jak in yana. Ham angge, omaaho sen navu taato sa langaahato  
hato ni.”

*Lalôôh Yesu de maanggêêm-aso lapak-ambe lala*

*(Matai 26:47-56; Luk 22:47-53; Jon 18:3-12)*

<sup>43</sup> Yesu naahen monanêel vakasin-anjo tonde sil nomaayuuu-hambe laam yuuu-anjôoto ti Yudas hato pavis, ond hako hil ngeeyaata be lako yipak ayuuu tapum sapa sil-hambe lalaam, ond kul vaha sen datung salivangin-ato silate yêêv-aso de tanasin dangga-so himbop-aso yoo lanêel ondeey sil lalaam. <sup>44</sup> De omaaho sen navu taato Yesu langaah-ato ond samu vakasin lung la vu sil nambe, “Ham angge naambe sa naamuuu omaahô-jû gaambôok ond yik yii-jû, tombe ham anôoh-hambe ham naapuvu niwêek-ande ham gako be ana.” <sup>45</sup> Om Yudas valup-hambe la vu Yesu pavis, be nêel nambe, “Kaputung,” tonde muuh† Yesu gaambôok. <sup>46</sup> Tombe yik lalôoh namand ak Yesu be lapuvu tatin, <sup>47</sup> lemu hil sen daale having Yesuu-to ond ti lôoh yipak ak-hambe sap yêêv bop salivangin-ate hil kul ti nanye vaalu be yêêhin. <sup>48</sup> Tombe Yesu nêel vu sil nambe, “Ham alaam in ham anôoh sa, lemu nambe vaati sen ham hako yipak ayuuu tapum sapa ham-hambe ham alaam nambe sen ham alaam vu omaaho hôondak ti? <sup>49</sup> + o 14:49 Luk 19:47; 21:37; Jon 18:20\* Lohvu busin pin sa nando monaawiing tanasin hôok Anutu-te dumb bop alo vu ham, le ham-ame nalôoh sa le. Mam lung-ande Anutu-te vakasin bôôy-ato nôon jak.” <sup>50</sup> + o 14:50 Mat 26:31\* Tombe sim yite maanggêem-aso pin lavuuu yi de lapak-

---

† **14:45:** Hil Yuda ond silate gambum nambe silate omaaho ti balup ond sil lana daamuuu gaambôok, yik nambe yiyate omaaho ti balup ond yiy naalôoh nama. Ond Yuda-te gambum nivalok-anju, lemu Yudas la muuh Yesu gaambôok ond tatuhin nambe ahe having yi, le ma de yoo taato Yesu vu hil in nambe lanôoh yii-to.



ambe lala. <sup>51</sup> Tombe maanggêêm ti taamuyin Yesu ond havêh tôtemb malis, tombe lalôoh yi, <sup>52</sup> le tôtemb kaah-ambe nando, de pak-ambe la ninôn.

*Yesu naale yêêv bop pin amend*

*(Matai 26:57-68; Luk 22:54-55,63-71; Jon 18:13-14,19-24)*

<sup>53</sup> Lako Yesu be lala vu kul vaha sen datang salivangin-ato silate yêêv bop, tombe tanasin dangga-so osin yêêv-aso salivangin-ate be himbop-aso pin lasupin sil lalaam timu. <sup>54</sup> Tonde Pita motaamuyin, le ma de yoo naale aheseseey daka, tombe monala be lukala yêêv bop salivangin-ate baan talind, be hato nando monanyuuh kin having ahevaavu-so. <sup>55</sup> Tombe yêêv-aso salivangin-ate osin kaansol-aso pin davu salo vakasin dangga in nambe lanyiis Yesu be jimb, le ma. <sup>56</sup> Tonde hil ngeeyaata lanêel vakasin tatuhin lak yi, lemu sil pin anêend vakasin-anju me-loh ti le. <sup>57</sup> De hil vaalu kandi daale be lanêel vakasin tatuhin lak Yesu nambe, <sup>58</sup> + o 14:58 Jon 2:19-21\*“Hey hangoyin-ande nêel nambe, ‘Sale kawiiy dumb vaambuung sen omaahonôn lahaav-ato, de busin yaal vêel e mem sale andaav ango sen omaahonôn-ame lalohvu nambe landaav e.’” <sup>59</sup> Tombe sil lanêel lôôt, le ma de silate vakasin-ame loh ti le. <sup>60</sup> Om yêêv bop salivangin-ate kandi naale hôok sil lavuun-ambe lingin Yesu nambe, “Game nanêel vakasin ti laah e? Hil-anjo danêel vaaheey lak hong?” <sup>61</sup> + o 14:61 Mak 15:5; Luk 23:9\*Le yoo naale lava masin lôôt, de me-nêel vakasin ti laah e, tombe yêêv

bop salivangin-ate lingin yi yesin laah nambe, “Anutu sen hey lavangg nahôôk yii-to ond noow sen yoo holin yi vulôôt in nambe dôôvu hey-ato ond yik hong-anja?” <sup>62</sup> + o 14:62 Saam 110:1; Taato 1:7\*Tombe Yesu liinggis nambe, “Êê-e saajo, de ham e angge Omaahonôôn Noow e mando Niwêék Danggakook nama vasa be naam hôôk bayiimb alo vu baandoni.” <sup>63</sup> Tombe yêêv bop salivangin-ate yoo kweek yite lolop nambe Anutu le ahekalin vu Yesu, de nêêl nambe, “Yiyy navu salo omaahonôôn in nambe le daanêêl vaati gaving? <sup>64</sup> + o 14:64 Jon 19:7\*Ham hango nambe nêêl Anutu palêê-jo, om ham akam vu nambe vaati?” Le sil pin lanêêl nambe, “Nêêl vakasin anipaya om yaanyiis-ambe jimb.” <sup>65</sup> Tombe hil vaalu kasuv ak yi, osin layum mekaalus-ande layiis yi de lanêêl vu nambe, “Onaanêêl omaaho ti sen yiis hong-ato langaah.” Tonde ahevaavu-so lapuvu yi de patap lôôt.

*Pita lak alu in Yesu*

*(Matai 26:69-75; Luk 22:56-62; Jon 18:15-18,25-27)*

<sup>66</sup> Pita naahen nando talind atonde kul vaha sen datang salivangin-ato silate yêêv bop, yite vêêh kul ti hatu <sup>67</sup> le yi de Pita monanyuuh kin, tombe get lôôt de nêêl vu nambe, “Hong-anja navu taamuyin Yesu Nasaalet having-ato.” <sup>68</sup> Le ma de Pita lak alu nambe, “Same alak ni le, sa doosin va sen ganêêl-anja.” Tombe seelin hatu laah ngaaho vu vinavi tonde kokalêêh su. <sup>69</sup> Tombe vêêh-anjuuto yi me lak Pita yesin, om nêêl vu hil sen daalêê-juuto nambe, “Hil-anjuuto

ond tii-ja.” <sup>70</sup> Le yik Pita lak alu yesin nambe, “Malis.” Daahen daale daka tonde hil sen daalêê-juuto lanêêl vu Pita yesin laah nambe, “Keen, hil-anjuuto silate ti hong-anjo, in hong Galili having-ato.” <sup>71</sup> Lemu Pita nêêl Anutu haale osin nêêl nambe, “Sa doosin omaaho sen ham nanêêl-anja keen baandoni.” <sup>72</sup> + o 14:72 Mak 14:30\*Tonde pavis atombe kokalêêh su tu balon ango yesin, tombe mem Pita ka vu vakasin sen Yesu nêêl vu yii-to nambe, “Kokalêêh-ame naasu balon yuuh e de gale ganjak alum in sa balon yaal vêêl e.” Ka vu vakasin-anju om lopayo nimeen-ande su lôôt.

## 15

*Yesu la naale Pilata me  
(Matai 27:1-2,11-14; Luk 23:1-5; Jon 18:28-38)*

<sup>1</sup> + o 15:1 Luk 22:66\*Samiinaanôn atombe kul vaha sen datung salivangin-ato silate yêêv-aso osin himbop-aso be tanasin dangga-so de kaansol-aso pin lasupin pavis-ambe lakaas lung la, tonde landuuh Yesu de laandiiy-ambe lala vu yêêv bop Lom ti haale nambe Pilata. <sup>2</sup> Tombe Pilata lingin Yesu nambe, “Yuda-te omaaho lulemak hong a?” Le nêêl nambe, “Yik ganêêl-anja.” <sup>3</sup> Tombe yêêv-aso salivangin-ate lanêêl vakasin ngeeyaata lak Yesu, <sup>4</sup> om Pilata lingin Yesu laah nambe, “Game nanêêl vakasin ti nalaah vu sil e? Gangge sil lanêêl vakasin ngeeyaata lak hong-anja.” <sup>5</sup> + o 15:5 Ais 53:7; Mak 14:61\*Lemu Yesu me-nêêl vakasin ti laah vu yi le, om Pilata ka la nge-ngeey.

*Pilata liinggis nambe lanyiis Yesu jak haah pako  
(Matai 27:15-26; Luk 23:13-25; Jon 18:39-19:16)*

<sup>6</sup> Lohvu ta pin hôök hil Yuda-te busin bop busin haluusin sen Anutu haluuh hil Islel hôök vu Ijip bôôy-ato, ond silate gambum ti neep nambe sil davu kataangg kalaambus-aso ti, de Pilata navu kavaayin kalaambus tii-ju be navu la malis vu sil. <sup>7</sup> Tombe omaahonôôn heey dando hôök kalaambus in dawiing ngaamong vu gaaman osin layiis hil vaalu be layimb, ond sil ti haale nambe Balabas, <sup>8</sup> om hil pin lala vu Pilata be sil kataangg nambe, “Goo gambiing naambe sen onawiing lohvu ta pin-ato.” <sup>9</sup> Tombe Pilata lingin laah vu sil nambe, “Ham awiingin nambe sa kavaayin Yuda-te omaaho lulemak vu ham a?” <sup>10</sup> Lingin nambêênju in lak ni nambe kul vaha sen datang salivangin-ato silate yêêv-aso ahend anipaya vu Yesu, ondeey sil laandiiy la vu yi. <sup>11</sup> + o 15:11-14 Sin 3:13-14; 13:28\* Lemu yêêv-aso salivangin-ate laanjiihin hil pin nambe, “Ham naateey niwêêk na vu Pilata naambe kavaayin Balabas naam vu ham.” <sup>12</sup> Tombe Pilata nêêl laah vu sil nambe, “De omaaho sen ham nanêêl nambe Yuda-te omaaho lulemak-ato ond saambiing vaati vu?” <sup>13</sup> Tombe lateey bopaata lôôt nambe, “Ganyiis jakana haah pako.” <sup>14</sup> Lemu Pilata nêêl vu sil nambe, “In? Wiing vaati paya deey?” Le ma de sil oo lateey niwêêk lôôt nambe, “Ganyiis jakana haah pako.” <sup>15</sup> Tombe Pilata wiingin nambe hil ahend anivasa jak, om kavaayin Balabas-ambe vu la vu sil, de Yesu ond nêêl-ambe ahevaavu-so laveek lôôt, le mem vu lukala hil Lom ngaamong vaha-so namand in nambe lanyiis jakana haah pako.

*Ngaamong vaha-so pale Yesu lôôt  
(Matai 27:27-31; Jon 19:2-3)*

<sup>16</sup> Hil Lom ngaamong vaha-so lako Yesu be lalukala yêêv bop-ate taaku lopayo, tombe lateey silate hil ngaamong vaha-so pin lalaam having. <sup>17</sup> + o 15:17-19 Luk 23:11\*Le mem sil lalop lolop amembu ti lukala Yesu de davu taahu omaaho lulemak ak yi, de sil lasêêy hees aniyin-ambe lambuuhin, tombe latung lakala Yesu lu, <sup>18</sup> tonde laakôôhin nambe, “Yuda-te omaaho lulemak omando-o.” <sup>19</sup> Tonde laveek lukook ak paatôôn ngasing ti, de sil kasuv ak, tonde latung kaatu vu yi be lako haale lak. <sup>20</sup> Sil pale Yesu lung la le mem lakaah lolop amembuu-ju vêêl in, de yoo lalop yite lukalaah yi, tonde mem lako be lala in lanyiis jakana haah pako.

*Layiis Yesu lakala haah pako  
(Matai 27:32-44; Luk 23:26-43; Jon 19:17-27)*

<sup>21</sup> + o 15:21 Lom 16:13\*Lala lato mop atombe latovu hil Sailini ti haale nambe Simon, sen noow Aleksanda yuuh Lupus-ato, ond vu kul-ambe hatu, tombe hil ngaamong vaha-so lanêêl niwêêk lôôt vu yi om kava Yesu-te haah pako. <sup>22</sup> Sil lako Yesu be lala lato taaku ti danêêl nambe Golagaata, dangga nambe taaku lukook. <sup>23</sup> Tombe sil kaasêêh malaasin anikalin ti\* lukala wain-ambe lavu vu Yesu in nambe naanum, le ma de nimbaya. <sup>24</sup> + o 15:24 Saam 22:18\*Tombe hil

---

\* **15:23:** Malaasin anikalin tii-jo haale nambe mul, ond haah ti nikanggi, ond davu vu hil in nambe sil anind naavi me-gasêêng e. Om sil lako be lavu vu Yesu tombe tep le ma de nimbaya, in wiingin nambe yoo gango nivaane be jimb.

ngaamong vaha-so layiis Yesu lakala haah pako lung la, tonde sil laate tatuuh-ambe tambe lak Yesu-te lolop-ande latiiy lohvu sil, tombe yik hil ngaamong vaha-so yoo lako lolop ti ti lohvu sil.

<sup>25</sup> Taaku me sen layiis Yesu lakala haah pakôô-to

ond 9 kilok samiinaanôn. <sup>26</sup> Tombe sil kaavu vakasin sen lanêel ak yii-to neep ak nambe, “Yuda-te Omaaho Lulemak.” <sup>27</sup> Tonde layiis hil hôondak yuuhapim having Yesu, ango naale nama kêenj de ango naale nama vasa. <sup>28</sup> + o 15:28 Ais 53:12\*[Om yik vakasin bôôy sen lukaneep kaapiyaa-to nôôn ak nambe, “Lasevin yi having hil anipaya.”]

<sup>29</sup> + o 15:29 Saam 22:7; 109:25; Mak 14:58; Jon 2:19\*Tombe hil ngeeyaata sen daale danjung-ato layi be lalaah namand vu, de lawiing kangasin vu Yesu lôôt nambe, “Wopo, hong sen ganêel nambe gale kawiiy Anutu-te dumb vaambuung-ande nohvu busin yaal gale gandaav naah-atônjo, <sup>30</sup> om goo gandôôvu hong-ambe onggavuuh haah pakôô-ja de ganduus-ambe ganaam

voon-o.” <sup>31</sup> Tombe kul vaha sen datung salivangin-ato silate yêêv-aso osin tanasin dangga-so yoo lakaas vu sil-ambe sil pale Yesu having nambe, “Hôôvu hil vaalu de me-lohvu nambe yoo dôôvu yi le. <sup>32</sup> Om naambe Anutu yoo holin yi vulôôt-ambe tu hil Islel-ate omaaho lulemak keen ond duus-ambe naam voon, ond mem yaangge be yaambiing gaving yi.” De omaaho yuuh sen layiis yuuh having Yesuu-to ond yuuh lanêel Yesu pale having.

*Yesu yimb la**(Matai 27:45-56; Luk 23:44-49; Jon 19:28-30)*

<sup>33</sup> + o 15:33 Emo 8:9\*Taaku mekaalus laam naale lavuun atombe taaku mekanu hôôk lohvu taaku pin-ambe laam soosin hôôk lohvu taaku me yaal. <sup>34</sup> + o 15:34 Saam 22:1\*Tombe taaku me yaal-anjo Yesu teey bopaata lôôt nambe, “Eloi, Eloi, lama sabatani?” Dangga nambe, “Sate Anutu, sate Anutu, nambe vaati om ohavuuu sa la?” <sup>35</sup> Tombe sim hil vaalu sen daale ngaahôô-to langoyin-ambe lanêel nambe, “Ke, ham gango, nateey Eliya.” <sup>36</sup> + o 15:36 Saam 69:21\*Tonde omaaho ti saloongg-ambe la hako malumak-ambe laanggôôl hôôk bel anikalín, tombe havin-gin malumak-anju hôôk ngasing vaha de hako be la vu lukala Yesu avi in nambe dasuvin, de nêel nambe, “Ham baale de yaangge naambe Eliya le gato nôôh yi duus me malis.” <sup>37</sup> Tonde Yesu teey lava bopaata de yimb la.

<sup>38</sup> + o 15:38 Hiblu 10:19-20\*Tombe tôômb bopaata dinaandiin lôôt sen yakaluuh Anutu-te dumb vaambuung alopayôô-to kweek la yuuh vu vaavu be la hoow. <sup>39</sup> Tombe hil Lom-ate yêêv ngaamong vaha ti naale ngaaho vu Yesu me ond yi de Yesu yimb la, om nêel nambe, “Ham hile, omaahôô-jo Anutu Noow keen.” <sup>40</sup> + o 15:40 Luk 8:2-3\*Tonde vêêh heey daale diin daka be mondayi ond ti Malia vu Magadala, de Malia ango sen Jems pasiv ayuuh Joses taandin-ato, de tik Saalome. <sup>41</sup> Bôôy sen Yesu naahen nando Galilii-to ond vêêh yaal-anju davu taamuyin yi de dahôôvu yi, de vêêh ngeeyaata daale having yaal ond sil ahondoos laving Yesu be lala Yelusalem.

*Lambe Yesu naavi lukala lavandangga  
(Matai 27:57-61; Luk 23:50-55; Jon 19:38-42)*

<sup>42</sup> De soosin hôök atombe hil pin davu samu sil in samiinaanôn ond busin sawaasin, om kaansol ti, <sup>43</sup> haale nambe Yusep vu Alimatia, ond omaaho osin haale bop, de ka navu busin sen Anutu naam in ganggin yite hil-ato, ond lo nôôn timu de la vu Pilata be kataangg Yesu naavi nambe gako be na gambe na. <sup>44</sup> Om Pilata hango tombe vindis in vakasin sen Yesu yimb lung laa-to, om teey ngaamong vaha-sote yêêv laam-ambe lingin nambe, “Yesu yimb la gêên a?” <sup>45</sup> Pilata hangoyin vu ngaamong vaha-sote yêêv lung la le mem liinggis vu Yusep nambe na nôôh omaahonôn vêêl. <sup>46</sup> Tombe Yusep vaanggo tôômb valôôy ti be hako be la lôôh omaahonôn luus-ambe vayum hôök, tombe mem la hambe lukala neep hôök lavandangga ti sen lasap hôök tatuuh danggaa-to, tonde paliy tatuuh bopaata ti laah hilin lavandangga avi jeen. <sup>47</sup> Tombe Malia Magadala de Malia ango sen Joses tangganaan-ato, ond yuuh lala layi taaku sen lambe Yesu naavi neep hôök-ato.

## 16

*Yesu kandi lak  
(Matai 28:1-8; Luk 24:1-12; Jon 20:1-10)*

<sup>1</sup> Busin sawaasin lung la le mem Malia Magadala de Malia ango sen Jems tangganaan-ato de Saalome, ond yaal lala laanggo bel galovasa be yaal lako in nambe lana kaasêêh ak Yesu naavi. <sup>2</sup> Om Sonda samiinaanôn atombe yaal kandi be lala lavandangga sen lambe Yesu hôök-ato.



<sup>3</sup> Tombe vu mopaatôôv ond yaal mondanêel vu yaal nambe, “Peey e lati le paliy tatuuh sen hilin lavandangga avii-to na vêel in waay?” <sup>4</sup> Tonde lavêel mend ak e layi de tatuuh seelin vêel, tatuuh-anju bopaata lôôt. <sup>5</sup> Tombe yaal lalukala lavandangga lopayo be yaal layi de maanggêem ti lop lolop valôôy diin ti be nando laah osin yaal namand vasa, tombe yaal lavindis lôôt. <sup>6</sup> Tombe nêel vu yaal nambe, “Maal-ame ambindis e. Maal navu salo Yesu Nasalet sen layiis ak haah pakôôto, ond me-neep-anjo le, kandi lak lung la, maal angge ahembaan nganjo. <sup>7</sup> + o 16:7 Mat 26:32; Mak 14:28\*Om maal anaah naanêel banye vu yite maanggêem-aso be Pita gaving, naambe le naamunggin-ambe na Galili, le mem ham e angge yi vuu-ju nohvu vakasin sen nêel vu ham-ato.” <sup>8</sup> Tombe yaal kanund la be lahees lôôt, om yaal lalom voon e mem yaal lapak-ambe lala, lemu yaal-ame lanêel banye vu omaaho ti le, in yaal layêenin lôôt.

*Yesu taato yi vu Malia Magadala  
(Matai 28:9-10; Jon 20:11-18)*

<sup>9</sup> + o 16:9 Luk 8:2\*[Yesu kandi lak hôök Sonda samiinaanôôn atombe taato yi munggin vu Malia Magadala sen Yesu hatiiy mamu ni-paya namaavaalu be vindak yuuh la in bôôy-ato, <sup>10</sup> tombe vêêh-anjo laah vu hil sen davu taamuyin Yesuu-to in londpayo nimeen-ambe mondasu, tombe nêel banye vu sil. <sup>11</sup> Tombe sil lango banye nambe Yesu nando metumin-ambe vêêh-anju yi me lak, lemu sil-ame lawii-having lava le.

*Yesu taato yi vu maanggêêm yuuh vu mop lavuun*

*(Luk 24:13-35)*

<sup>12</sup> Tonde sim silate omaaho yuuh vu bayêên bop-ambe lala in lana, tombe Yesu taato yi vu yuuh vu mop lavuun, lemu ninaavi ngo yoow.

<sup>13</sup> Tombe yuuh lalaah-ambe yuuh lanêêl vu yuuhate hil vaalu, le sil-ame lawii-having e.

*Yesu vu kul vu maanggêêm nomaayuuh-ambe laam ti*

*(Matai 28:16-20; Luk 24:36-49; Jon 20:19-23)*

<sup>14</sup> + o 16:14 1Ko 15:5\*Tonde sim maanggêêm nomaayuuh-ambe laam ti dando mondaya vanôn atombe Yesu la hato be taato yi langaah vu sil, de nêel sil in me-lawii-having yi le, in londpayo niwêêk, de me-lawii-having hil sen layi mend ak-ande kandi lak-ato lavand e. <sup>15</sup> + o

16:15 Sin 1:8\*Tonde mem nêel vu sil nambe, “Ham anohvu taaku pin-ambe ham ana naanêêl sate banye nivasa langaah vu omaahonôn pin.

<sup>16</sup> + o 16:16 Sin 2:38; 16:31,33\*Hil sen londpayo naam timu vu sa be lanjipis bel, ond sil e mando metumin danggata, de hil sen londpayo me-wii-having e ond le daatovu nipaya nyevahaan-ambe lana mend nama. <sup>17</sup> + o 16:17 Sin 2:4; 10:46; 8:7\*Hil sen londpayo laam timu vu saa-to ond sil

e lambiing taahu taahu osin niwêêk, sil e gatiy mamu nipaya jak sa haalengg osin sil e bakaas bayêên bu ti ti lavand. <sup>18</sup> + o 16:18 Luk 10:19; Sin 28:3-6; 4:30; 5:16\*Tonde sil namand e nanôôh nyêêy jak, de naambe daanum va yimbin-ate yuuh ame ond vati me-le biing sil e, de sil e gambe

namand jak hil anilakin-ambe nind vasa jak.”

*Yesu lakalaah baandoni*  
(*Luk 24:50-53; Sinaale 1:9-11*)

<sup>19</sup> + o 16:19 Sin 2:33-34; 7:55-56; Ep 1:20; 1Pi 3:22\*Omaaho Bop Yesu vakaas having sil lung la, tonde Anutu hako yi be la nando nama vasa having yi vu baandoni in taato naambe tu yêêv bop. <sup>20</sup> + o 16:20 Sin 14:3; Hiblu 2:3-4\*Tonde maanggêêm-aso lala lanêêl banye nivasa lohvu taaku pin, de Omaaho Bop yoo nando having silambe navu kaandu silate vakasin lak taahu taahu vaha vaha nambe vakasin nôôn keen.]

**Mangga Buang New Testament**  
**The New Testament in the Buang, Mangga Language**  
**of Papua New Guinea**  
**Nupela Testamen long tokples Mangga Buang long**  
**Niugini**

copyright © 1981 Wycliffe Bible Translators, Inc.

Language: Mangga Buang (Buang, Mangga)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-19

---

PDF generated using Haiola and XeLaTeX on 11 Nov 2022 from source files dated 9 Oct 2020

8d739032-2a4b-567d-abd1-cb7e24ed2cd6